

SK-4/14

ESPERANTA BIBLIOTEKO INTERNACIA

Tradukis
F. Pujulà y Vallès.

No. 5.
Prezo 0,10 Sm.


Don Kihoto de la Manĉo en Barcelono

5 ĉapitroj el la verko de
Don Miguel de Cervantes Saavedra.



BERLIN.

Esperanto Verlag Möller & Borel
kaj korespondantoj en
Paris, London, New-York, Kjöbenhavn, Warszawa, Barcelona,
Budapest, Livorno, Bucuresti, Moskvo.



La libroj de la
Esperanta Biblioteko Internacia
estas riceveblaj en:

Berlin de Esperanto Verlag Möller & Borel,
Lindenstrasse 18/19.

Paris de Hachette & Co., 79 Boulevard St. Germain.

London de British Esperanto Association,
Museum Station Buildings 133—6, High Holborn kaj
Review of Reviews, Mowbray House, Norfolk
street.

New York de Fleming H. Revell Comp, 158 Fifth
avenue.

Kjøbenhavn de Andr.-Fred, Höst & Sön,
Bregade 5.

Barcelona de Jaume Sales Balmes, Serra 13 pral.

Budapest de Lajos Kókai, Károly-Utca 1.

Livorno de R. Giusti, 53 Via Vittorio Emmanuele.

Warszawa de M. Arct, 53 Nowy Swiat.

Bucaresti de Libraria noua Carol P. Segal, Calea
Victoriei 78.

Moskvo de Moskva Librejo Esperanto, Tvers-
kaja 28.



Ĉiu libreto de la *Esperanta Biblioteko Internacia*
kostas unu spescenton (0,10 Sm) = 25 centimoj,
20 pfenigoj, 2¹/₂ pencoj, 5 cendoj, 24 heleroj,
10 kopekoj, 10 oeroj.



ESPERANTA BIBLIOTEKO INTERNACIA

Tradukis
F. Pujulà y Vallès.

No. 5.
Prezo 0,10 Sm.

Don Kihoto de la Manĉo en Barcelono

5 ĉapitroj el la verko de
Don Miguel de Cervantes Saavedra.



BERLIN.

Esperanto Verlag Möller & Borel

kaj korespondantoj en

Paris, London, New-York, Kjöbenhavn, Warszawa, Barcelona,
Budapest, Livorno, Bucuresti, Moskvo.



Federación Española de Esperanto
Hispana Esperanto - Federacio

Rodríguez San Pedro 13 - 3ª - 7, E-28015 MADRID
Tel. +34 - (91) - 4468078

00472

Antaŭparolo.

Multe oni skribis pri la verko „La sprita junkro Don Kihoto de la Manĉo“ de Don Miguel de Cervantes Saavedra. Aldoni opinion al la multaj opinioj, kiujn ĝi naskis, estus ago infana, kaj neĝustatempa, precipe antaŭ traduko nekompleta, antaŭ kelkaj ĉapitroj elektitaj kun speciala intenco. La celo de tiu ĉi antaŭparolo estas tute alia: simple klarigi la celon de la traduko, kaj prezenti al la legontoj la ĉefajn personojn, kiuj moviĝas en la kvin ĉapitroj. Kaj, por ne rigli plilongatempe per senutila babilado la pordon de la enirejo al tiel interesaj — laŭ la originalo, sed ne laŭ la traduko — verkoj, mi tute rekte klarigos kaj prezentos.

Mi diris aliloke, ke Barcelono estas la urbo simbole elektita de Cervantes por revenigi Don Kihoton en la realan vivon. La kastelo de fantaziaĵoj kreitaj de lia malsana spirito en Barcelono devis ruiniĝi. Li, kiu ĉie nur vidis malamikojn kaj kontraŭstarojn; li, al kiu la aloj de mueliloj ŝajnis gigantaj brakoj, kaj la malpuraj gastejoj — ensorĉitaj kasteloj, fatale devis fali venkita de la Kavaliro de la Blanka Luno en Barcelono. Kia pli bela scenejo por kuracejo de frenezulo, ol urbo kuŝanta apud la Mezamaro, kies ondoj lulis plej gravajn civilizaciojn? Kiu pli bona venkinto ol saĝa abituri-

16x0000helo 270044

ento, kiel Sanson Carrasco? La simbolo de tro proksime tuŝas nin esperantistojn; ĝiaj instruoj multege povas utili al ni por plifortigi nian fidon pri la venko.

Oni ofte diris, ke la granda genio de Cervantes antaŭvidis ĉion, kaj ke en lia verko troviĝas atentindaj ekzemploj por facile riĉigi nian propran sperton . . . Kio kostas al ni kredi, ke li ankaŭ antaŭvidis la grandan sensangan batalon, kiun ni — Kavaliroj de la Verda Stelo — okazigas en Barcelono — urbo elektita kiel kongresejo — kontraŭ la armeo da Don Kihotoj, kiuj nur vidas malamikojn ĉie, kaj priskribas la homon kiel sovaĝan kreitaĵon? Kio kostas al ni, iom fermi la okulojn, flugi iom per la imago, kaj revivi en ni, kion ni vivas en la paĝoj de tiuj ĉapitroj? Jen kiu estas mia celo, do: ebligi al la samideanoj la okazon de tiaj imagaĵoj kaj simboloj.

Koniginte mian celon, mi prezentos la personojn.

Se Don Kihoto estas animo, spirito (mi ne kuraĝas diri idealo), Sanĉo Panco, lia arm-paĝio, estas korpo (mi ne kuraĝas diri materio). Kiom la dua estas vulgara, tiom la unua estas freneza, malplena, aŭ plibone, plena de malpleno. Ambaŭ kune faras estajon, portreton de la lando, — miksaĵo de lazuro kaj tero, deflugiloj kaj galoŝoj, de aventuremo kaj maldelikatemo.

Ĉar Cervantes celis moki la verkojn pri kavaliroj, kiuj tiom da inteligentoj frenezigis en lia epoko, Don Kihoto devis esti provizita de ĉevalo, kiel ĉiu bona fama kavaliro, kiel Aleksandro — de Bucefalo, kiel Cido — de Babieca. Ĝi estas kompare kun la ĉevaloj de tiuj ĉi, kio

estas Don Kihoto mem kompare kun ili. Maldika, malforta, mallerta, Rocinanto estas la deca, inda rajdbesto de la heroo.

Oni diras pri Roque Guinart (kies vera kataluna nomo estas Roca Guinarda) kaj kiun oni renkontos en la tradukitaj ĉapitroj, ke li estas kataluna heroo. Cervantes prezentas lin kiel influan, bonkoran banditon. Negrava diferenco. Ofte en la homara historio oni konfuzis male.

Ĉar kavaliro sen amatino, estus kvazaŭ arbo sen radikoj, kaj ĉar ĉiu kavaliro enradikiĝis en la landon de Amoro, Don Kihoto, tuj akriĝinte siajn armilojn, elektis Dulcineon, kiel celon de siaj gloragoj. La fakton, ke Dulcineo estas nur simpla kamparanino — Aldonza Lorenzo, — klarigas Don Kihoto per sorĉo, el kiu li deziras eltiri ŝin per la pento de Sanĉo.

Fine, Cidē Amete Benengeli estas fiktiva araba historiisto, el kiu Cervantes ŝajnigas eltiri la historion, kiel ĉiu aŭtoro de Kavalirara verko.

La aliaj personoj aperas unuafoje en tiuj ĉapitroj, kaj la aŭtoro mem zorgas prezenti ilin.

Kaj nun, ĉar ni estas en la prezentada momento, nur restas al mi prezenti miajn senkulpigojn tial, ke mi metis manon sur la klasikan verkon.

Barcelono, Junio 1909.

Fred. Pujulà y Vallès.

... . tiel, mi senhalte pasis al Barcelono, arhivo de la ĝentileco, rifuĝejo de la fremduloj, hospitalo de la malriĉaj uloj, patrolando de la kuraĝuloj, venĝo de la ofenditoj, afabla korespondado de amikecoj firmaj, kaj senegala je sidejo kaj beleco.
„Don Kihoto de la Manéo“
(Ila parto, Ĉapitro LXXII).

Ĉapitro LXI.

Pri tio, kio okazis al Don Kihoto eniranta en Barcelonon, kaj aliaj aferoj pli veraj ol diskretaj.

Tri tagojn kaj tri noktojn restadis Don Kihoto kun Roque, kaj eĉ se li restus tricent jarojn ne mankus al li aferoj, por miri kaj admiri en lia vivmaniero. Ĉi tie ili vekigis, tie ili manĝas; kelkajn fojojn ili forkuras nesciante pro kiu, aliajn ili atendas, nesciante kiun. Ili dormas starante, interrompante la dormon, vagante de unu loko al alia. Ili senĉese dissendas spionojn, observas la gardostarantojn, blovas la meĉojn de la meĉpafiloj, kvankam ili kunportis malmultajn el tiuj ĉi, tial ke preskaŭ ĉiuj uzas la ŝtonpafilojn. Roque pasigis la noktojn malproksime de sia bando, en lokoj, kiujn ili ne konas, ĉar la multaj ediktoj, kiujn la vicreĝo de Barcelono estis jetinta sur lian vivon, maltrankviligis kaj timigis lin kaj li kuraĝis konfidi al neniu, timante ke liaj amikoj mem ĉu mortigos, ĉu liveros lin al la juĝistoj: vivo certe tre mizera kaj enua. Fine, tra neuzitaj kaj kaŝitaj vojoj, ekiris Roque, Don Kihoto kaj Sanĉo kun aliaj ses armservistoj

al Barcelono. Ili alvenis al ĝia marbordo la antaŭtagon de la Sankt' Johanafesto dum la nokto, kaj Roque ĉirkaŭpreninte Don Kihoton kaj Sanĉon, al kiu li donis la dek ormonerojn promesitajn, kiujn ĝis nun li ne estis doninta, ilin forlasis post mil afablaĵoj reciprokaj. Foriris Roque, kaj restis Don Kihoto atendante la tagiĝon, sur la ĉevalo. Ne longe daŭris ĝis komencis montriĝi tra la orientaj balkonoj la vizaĝo de la blanka aŭroro, gajigante la herbon kaj la florojn anstataŭ gajigi la aŭdadon, kvankam samtempe gajigis ankaŭ la aŭdadon la sono de la multaj flutoj kaj tamburoj, la bruo de tintiletoj, la svarmo kaj trotado de ĉevaloj, kiuj ŝajne eliras el la urbo. Faras lokon la aŭroro al la suno, kiu kun vizaĝo pli granda ol tiu de ŝildo, el sub la plej malalta horizonto, iom post iom supreniras. Etendis Don Kihoto kaj Sanĉo la rigardon ĉien; ili vidis la maron, ĝis tiam de ili ne viditan: ĝi ŝajnis al ili tre vasta kaj longa, multe pli ol la lagunoj de Ruidera, kiujn en la Manĉo ili vidis. Ili vidis la galerojn, kiuj flosis ĉe la sabla bordo kaj kiuj mallevinte la tendojn elmontriĝis plenaj de festflagoj, kiuj flagris ĉe la vento kaj kisis kaj balais la akvon: interne sonoris kornetoj, trumpetoj kaj flutoj, kiuj proksime kaj malproksime plenigis la aeron per mildaj kaj batalaj akcentoj: ili komencis moviĝi kaj fari kvazaŭ bataleton sur la trankvilaj akvoj. Preskaŭ samtempe alvenis sennombraj kavaliroj, kiuj el la urbo, sur belegaj ĉevaloj kaj kun riĉaj livreoj, eliris. La soldatoj de la galeroj pafigis sennombran artilerion, al kiu respondadis tiuj, kiuj estis en la muregoj kaj fortikajoj de la urbo; kaj la peza artilerio rompadis la ventojn kun terura

bruego, al kiu respondadis la ferdekaj kanonoj de la galeroj. La maro gaja, la tero ĝoja, la aero pura kaj nur malklarigita de la artileria fumo ŝajnis kaŭzi kaj naski subitan plezuron en la tuta homamaso. Sanĉo ne povis imagi, kiel povas havi tiom da piedoj tiuj korpoj, kiuj moviĝadas sur la maro. Dume, la livreuloj alvenis kun kriado de batalo kaj ĝojo tien, kie Don Kihoto surprizita kaj mirigita restis. Unu el ili, kiu estis avizita de Roque, diris per laŭta voĉo al Don Kihoto: „Bonveninta estu en nian urbon la spegulo, la lanterno, la stelo, la astro kaj la nordo de la tuta migranta kavaliraro, kiu plej larĝe ĝin entenas. Bonveninta estu, mi diras, la kuraĝa Don Kihoto de la Manĉo: ne la falsa, ne la fiktiva, ne la apokrifa, kiun per falsaj historioj lasttempe oni montris al ni, sed la vera, la lojala, la fidela, kiun priskribis al ni Cide Hamete Benengeli, floro de la historiistoj.“ Don Kihoto ne respondis vorton, kaj la rajdantoj ne atendante lian respondon sed turniĝante kaj returniĝante kun la aliaj, kiuj ilin sekvis, komencis fari volvantan helikiron ĉirkaŭ Don Kihoto, kiu sin turnante al Sanĉo diris: „Tiuj ĉi bone rekonis nin; mi vetus, ke ili legis nian historion kaj eĉ tiun de la Aragonano nove presitan.“ Revenis denove la rajdanto, kiu parolis al Don Kihoto, kaj li diris: „Via Moŝto, Sinjoro Don Kihoto, venu kun ni, ĉar ni ĉiuj estas viaj servantoj kaj grandaj amikoj de Roque Guinart.“ Kaj al tio respondis Don Kihoto: „Se ĝentilajoj naskas ĝentilajojn, via ĝentileco, sinjoro kavaliro, estas ido aŭ proksima parenco de tiu de la granda Roque: konduku min, kien vi volas, ĉar mi ne havos alian volon ol la vian, des pli se vi deziras dediĉi

ĝin al via servo.“ Per vortoj, ne malpli afablaj ol tiuj ĉi, respondis la rajdanto, kaj ĉirkaŭfermante lin en la mezo, ĉe la sono de flutoj kaj tamburoj ili ekmarŝis kun li en la urbon, ĉe kies eniro, la Malbonulo*), kiu ĉiam malbonon ordonas, kaj la buboj, kiuj estas pli malbonaj ol la Malbonulo: du el ili, pli kuraĝaj kaj sentimaj ol la aliaj, sin interŝovis mezen de la aro kaj unu levante la voston de la azeno kaj la alia tiun de Rocinanto, ili enmetis kaj alĝustigis al ĉiu faskon da kardoj. Sentis la malfeliĉaj bestoj la novajn spronojn, kaj alpremante la vostojn, ili pligrandigis la suferon tiamaniere ke farinte mil kapriolojn, ili sendis siajn mastrojn sur la teron. Don Kihoto, hontinta kaj ofendita, alkuris formeti la tufon el sub la vosto de sia ĉevalaĉo, kaj Sanĉo tiun de sia azeno. Volis tiuj, kiuj kondukis Don Kihoton, puni la sentimecon de la infanoj, sed tio ne estis ebla, ĉar ili sin intermiksas, kun pli ol mil aliaj, kiuj ilin sekvis. Ekrajdis ree Don Kihoto kaj Sanĉo, kaj kun sama plaŭdado kaj muziko ili alvenis ĉe la de sia kondukanto domon, kiu estis bela kaj granda, kiel tiu de riĉa kavaliro, kaj kie ni ilin lasas nun, ĉar tiel deziras Cide Hamete.

*) Vorto, per kiu tiam la hispanoj nomis la diablon. Ni konservas dokumente la strangan sintakson de la originala frazo, kies senco estas ankaŭ malklara en la hispana lingvo. La senco estas eble la jena: „La diablo ĉiun malbonon ordonas, kaj la buboj estas pli malbonaj ol la diablo mem. Du el tiuj buboj, kiuj troviĝis ĉe la eniro de la urbo, pli kuraĝaj kaj sentimaj ol la aliaj“ La tradukinto.

Ĉapitro LXII.

Kiu traktas pri la aventuro de la ensorcita kapo kun aliaj infanaĵoj, kiujn nepre oni devas rakonti.

La gastiganto de Don Kihoto estis nomata Don Antonio Moreno, Sinjoro riĉa kaj saĝa, amiko de honestaj kaj afablaj aferoj kaj kiu, vidante en sia hejmo Don Kihoton, pripensis la manierojn per kiuj, sen malutilo por sia gasto, li povus elmontri publike liajn frenezajojn; ĉar la mokoj ne doloras, kaj nur ne estas bonaj la amuzoj se ili venas kun malbono por alia. La unua afero, kiun li faris, estis senarmigi Don Kihoton, kaj elmontri lin, kun tiuj mallargaj kaj ŝankoloroj vestaĵoj (kiujn jam antaŭe ni priskribis) sur balkono malfermanta al unu el la plej ĉefaj stratoj de la urbo, al la rigardado de la personoj kaj infanoj, kiuj admiris lin kvazaŭ simion. Kuris denove antaŭ li la livreaj rajdantoj, kvazaŭ por li sola kaj ne por festi tiun festan tagon, ili surmetis la livreojn. Sanĉo estis feliĉega tial, ke al li ŝajnis, ke li troviĝas, nesciante kial nek kiel, ĉe alia edziĝo de Kamaĉo, en alia hejmo kiel tiu de Don Diego de Miranda, kaj en alia kastelo, kiel tiu de la duko.

Manĝis tiun tagon kun Don Antonio kelkaj el liaj amikoj, ĉiu honorante kaj regalante Don Kihoton kiel migrantan kavaliron, ĉe kio li, vanta kaj pompa, krevis el sia haŭto pro kontento. La spritaĵoj de Sanĉo estis tiom, ke de lia buŝo restis kvazaŭ pendantaj ĉiuj servistoj de la domo kaj ĉiuj, kiuj aŭdis lin. Ĉe la manĝotablo, diris Don Antonio al Sanĉo: „Ĉi tie ni scias, bona Sanĉo, ke vi tiel ŝatas la

dolĉaĵojn kaj la viand-hakajon, ke se restas iom da ili, vi ilin gardas ĉe la brusto ĝis la sekvanta tago.“ Ne Sinjoro, ne estas tiel — respondis Sanĉo — ĉar mi estas pli purema ol manĝegema, kaj mia mastro Don Kihoto, kiu estas ĉi tie kontraŭ ni, scias bone, ke kun manpleno da glanoj aŭ da juglandoj ni ambaŭ kutimas vivi ok tagojn: ja certe estas, ke se okaze oni donas al mi la bovinon mi prenas ĉe la ŝnuron; mi volas diri, ke mi manĝas tion, kion oni al mi donas kaj mi uzas la tempojn tiel, kiel mi ilin trovas. Kiu ajn diris, ke mi estas granda manĝemulo kaj nepuremulo, sciu ke li ereras, kaj mi tion ĉi alimaniere deklarus se mi ne respektus la honorindajn barbojn, kiuj estas ĉirkaŭ la manĝotablo.“ „Vere, — diris Don Kihoto — la parsimonion kaj purecon, kun kiuj Sanĉo manĝas, oni povas skribi kaj gravuri sur bronzaĵ lamenoj, por ke ili restu en la eterna memoro de la venontaj jarcentoj. Certe estas, ke kiam li estas malsatega, li ŝajnas iom englutema, tial ke li manĝas rapide kaj maĉas per la du flankoj de la buŝo; sed ĉiam li respektas la purecon. Dum la tempo, kiam li estis provincestro, li lernis manĝi kiel afektulo, tiamaniere, ke li manĝadis per forko ĉe la vinberojn kaj ĉe la grajnoj de granatoj.“ „Kiel! — diris Don Antonio — Ĉu Sanĉo estis provincestro?“ „Jes, — respondis Sanĉo, — kaj de insulo nomata Barataria. Dek tagojn mi ĝin regadis laŭvole; dume mi perdis la trankvilecon kaj lernis malestimi ĉiujn regecojn de la mondo; mi eliris el ĝi forkurante, mi falis en groton, kie mi juĝis min mortinta kaj el kiu mi eliris vivanta nur mirakle.“ Rakontis detale Don

Kihoto la tutan okazon de la regado de Sanço, per kio li multe plezurigis la aŭdantojn.

Post manĝo, prenante la manon de Don Kihoto, Don Antonio eniris kun li en apartan ŝalonon, en kiu ne estis alia ornamajo ol tablo verŝajne el jaspo, kiu sin tenis sur piedestalo el sama materio, kaj sur kiu estis metita, laŭ la maniero de la kapoj de la romaj imperiestroj, kapo, kiu ŝajnis esti el bronzo. Promenis Don Antonio kun Don Kihoto tra la tuta salono, ĉirkaŭirante multajn fojojn la tablon, post kio li diris: „Nun, Sinjoro Don Kihoto, kiam mi scias, ke aŭdas nek aŭskultas nin neniu, kaj la pordo estas fermita, mi volas rakonti al via moŝto unu el la plej maloftaj aventuroj, aŭ, por plibone paroli, novaĵoj, kiujn oni povas imagi; kondiĉe ke, tion, kion al via moŝto mi diros, vi deponos en la lastaj restejoj de la sekreto.“

„Tiel mi ĵuras, — respondis Don Kihoto, — kaj eĉ mi ĵetos sur ĝin platŝtonon por pli bona trankvilo; ĉar mi volas, ke via moŝto sciu, Sinjoro Don Antonio, (li jam sciis lian nomon), ke vi parolas kun iu, kiu, kvankam li havas orelojn por aŭdi, ne havas laŭgon por paroli: tiel do, sentime povas via Moŝto transporti tion, kion vi havas en la brusto, en la mian, kaj konsideri ke vi ekĵetis ĝin en la abismojn de la silento.“

„Kiel fido al tiu promeso, — respondis Don Antonio, — mi volas, mirigi vin per tio, kion vi vidis kaj aŭdis, kaj malpezigi la ĉagrenon, kiun kaŭzas al mi, havi neniun por komuniki miajn sekretojn, kiuj ne estas konfideblaj al ĉiuj.“ Mirigita restis Don Kihoto atendante la rezulton de tiom da antaŭparoloj. Post tio, Don Antonio, preninte al li la manon, promenigis ĝin sur la bronza kapo, kaj tra

la tuta tablo, kaj la jaspaj piedestalo, sur kiu ĝi subteniĝis, kaj poste li diris: „Tiu ĉi kapo, Sinjoro Don Kihoto, estas farita kaj fabrikita de unu el la plej gravaj sorĉistoj kaj ĉarmistoj, kiuj en la mondo ekzistas, kaj kiu, mi kredas, estis el pola nacio kaj disciplo de la famekonata Escotillo, pri kiu tiom da mirigaĵoj oni rakontas. Li estis ĉi tie en mia hejmo kaj por la prezo de mil ormoneroj, kiujn mi al li donis, li ĉizis tiun ĉi kapon, kiu havas la econ kaj la virton respondi, pri kiom ajn da aferoj, oni demandas ĝin. Li zorgis pri rumboj, pentris ciferojn, observis astrojn, rigardis punktojn, kaj fine kreis ĝin kun la perfekteco, kiun ni morgaŭ vidos, ĉar la vendredojn ĝi estas muta, kaj hodiaŭ vendrede ĝi atendigos nin ĝis morgaŭ. Dum tiu tempo, via moŝto povos pripensi, kion li volos demandi; mi per sperto scias ke ĝi diras veron en ĉio, pri kio oni demandas ĝin.“ Mirigita restis Don Kihoto de la eco kaj kvalito de la kapo, kaj eĉ preskaŭ ne kredis al Don Antonio; sed vidante, kiom malmulte da tempo restis por fari la eksperimenton, li nur diris, ke li multe dankas lin, pro tio, ke li malkaŝis al li tiel gravan sekreton. Ili eliris el la salono, Don Antonio ŝlisis la pordon, kaj ili iris al la salono, kie estis la aliaj sinjoroj. Dum tiu tempo, Sanĉo rakontis al ili multajn el la aventuroj kaj okazintaĵoj, kiuj al lia mastro kaj al li okazis.

Tiun posttagmezon ili promenigis Don Kihoton, ne armitan sed vestitan por promenado, kun leonkolora talaro, kiu povus ŝvitigi en tiu sezono la glacieron mem. Ili aranĝis kun la servistoj, ke tiuj ĉi distros Sanĉon tiamaniere, ke ili ne lasu lin foriri el la hejmo. Rajdis

Don Kihoto ne sur Rocinanto sed sur granda mulo de egala amblo kaj bone ornamita. Oni surmetis al li la talaron, kaj sur la dorson, ne vidite de li, ili alkudris pergamenon, kien ili skribis per grandaj literoj: „Jen estas Don Kihoto de la Manĉo.“ Ĉe la komenco de la promenado, la kartelo altiradis la rigardon de ĉiuj, kiuj venis vidi lin, kaj tial ke ili legadis: „Jen estas Don Kihoto de la Manĉo,“ Don Kihoto miris vidante ke ĉiuj, kiuj vidas lin, lin nomas kaj rekonas; kaj sin turnante al Don Antonio, kiu estis apud li, li diris: „Granda estas la prerogativo, kiun entenas la migranta kavaliraro; ĉar fariĝas konata kaj fama tiu, kiu profesias ĝin tra ĉiuj ekstremaĵoj de la tero; rimarku nur via moŝto Sinjoro Don Antonio tion, ke eĉ la infanoj de tiu ĉi urbo, kvankam ili neniam vidis min, ĉiuj min konas.“ „Tiel estas, Sinjoro Don Kihoto, — respondis Don Antonio —; ĉar, kiel la fajro ne povas resti kaŝita kaj fermita, tiel la virto ne povas resti nekona, kaj la virto, kiun oni atingas per la profesio de la armiloj brilas kaj superregas super ĉiuj aliaj.“

Okazis do, ke dum Don Kihoto iris meze de la aplaŭdo pri kiu oni parolis, Kastilano, kiu legis la kartelon de la dorso, laŭtigis la voĉon dirante: „La diablo kun vi Don Kihoto de la Manĉo!; kiel vi ĝis tie ĉi alvenis ne mortinte pro la sennombraj batoj, kiujn vi ricevis? Vi estas freneza, kaj se almenaŭ vi estus tia en soleco kaj malantaŭ la pordoj de via frenezeco! . . . Sed vi havas kapablon frenezigi kaj malspritiĝi ĉiujn, kiuj vin konas kaj kun vi interkomunikas; rigardu nur tiujn Sinjorojn, kiuj akompanas vin. Revenu, malspritulo, al

via hejmo, kaj zorgu pri via bieno, pri via edzino kaj pri viaj filoj, kaj lasu tiujn vanajojn, kiuj mordetas vian cerbon kaj ruinigas vian inteligentecon.“ „Frato, — diris Don Antonio, — sekvu vian vojon kaj ne donu konsilojn al tiu, kiu ne petas ilin. Sinjoro Don Kihoto de la Manĉo estas tre saĝa kaj ni, kiuj akompanas lin, ne estas malprudentaj; la virton oni devas honori, kie ajn oni ĝin renkontas; kaj vi iru al la diablo, kaj ne enŝovu vin tien, kien oni vin ne vokas.“ „Nu, via moŝto estas prava, — respondis la Kastilano, — ĉar konsili tiun malfeliĉulon, estas kvazaŭ piedfrapi al la abela pikilo; tamen, mi multe bedaŭras, ke la spriteco, kiun laŭdire montras en ĉiu afero tiu ĉi sensaĝulo, elŝprucas el li tra la defluejo de lia migranta kavalireco. Al la diablo, pri kiu vi parolis, iru mi kaj ĉiuj miaj idoj, se de nun, eĉ se mi vivus pli da jaroj ol Matusalemo, mi donos konsilon al iu ajn, eĉ se oni ĝin de mi petos.“ Deflankiĝis la konsilinto; antaŭeniris la promenantoj; sed estis tia la febro, kiun havis la infanoj kaj ĉiuj, legante la kartelon, ke Don Antonio estis devigata formeti ĝin, ŝajnigante ke li forigas alian aferon.

Alvenis la nokto; ili revenis hejmen, okazis balo kun sinjorinoj; ĉar la edzino de Don Antonio, kiu estis Sinjorino altranga kaj gaja, bela kaj saĝa, invitis aliajn el siaj amikinoj, por ke ili venu honori ŝian gaston kaj ĝui lian neniam viditan frenezecon. Kelkaj venis; oni riĉe vespermanĝis kaj la balo komenciĝis je la deka horo vespere. El la sinjorinoj, estis du kun petola kaj mokema spirito kaj, kvankam tre honestaj, tro senĝenaj por ke la mokoj gajigu sen kolerigo. Ili rapidis inviti al la

dancado Don Kihoton, al kiu ili muelis ne nur la korpon sed la animon. Estis vidinda afero, la figuro de Don Kihoto longa, etendita, malgrasa, flava, kunpremita en la vestaĵoj, sengracia kaj precipe tre peza. Amindumadis lin kvazaŭ kaŝeme la sinjorinoj, kaj li, ankaŭ kaŝeme, malestimadis ilin. Sed vidinte sin sieĝatan de la amvortoj, li laŭtigis la voĉon kaj diris: „Fugite partes adversæ“: lasu min en mia trankvileco, malbonvenintaj pensoj: iru for, sinjorinoj, kun viaj deziroj, ĉar tiu, kiu estas reĝino de la miaj, la senegala Dulcineo de l' Toboso, ne permesas, ke aliaj ol la ŝiaj regadu min kaj min venku.“ Tion dirinte li sidigis teren, en la mezon de la salono, muelita kaj disrompita de tia danca ekzercado. Don Antonio ordonis ke oni lin portu sur lian liton, kaj la unua, kiu lin atingis, estis Sanĉo dirante al li: „En malbona horo, sinjoro mia mastro, vi dancis: ĉu vi kredas, ke ĉiu kuraĝulo estas dancemulo kaj ĉiu migranta kavaliro baletisto? Mi diras, ke se vi tion pensas, vi eraras: homoj estas kiuj preferus mortigi giganton ol fari kapriolon; se vi devos saltodanci mi anstataŭos vian mankon, ĉar mi dancosaltas kiel falko; sed rilate al la platdanco mi tute ne sukcesas.“ Per tiuj kaj aliaj rezonadoj, ridigis Sanĉo la balon kaj metis sian mastron en la liton, kovrante lin multe, por ke li ŝvitu la malvarmumon post la danco.

En la sekvanta tago, ŝajnis bone al Don Antonio, fari la eksperimenton de la ensorcita kapo, kaj kun Don Kihoto, Sanĉo kaj aliaj amikoj, krom la du sinjorinoj, kiuj lacigis Don Kihoton en la balo kaj kiuj tranoktis kun la edzino de Don Antonio, tiu ĉi sin enfermis

en la salono, kie staris la kapo. Li rakontis al ĉiuj la econ, kiun ĝi havas, rekomendante al ili la sekreton, kaj li diris, ke tiu ĉi tago estis la unua, kiam oni devis provi la virton de tia ensorĉita kapo. Escepte la du amikoj de Don Antonio, neniuj aliaj personoj sciis pri la artifiko de la sorĉo kaj eĉ se Don Antonio ne antaŭe malkaŝus ĝin al siaj amikoj, ankaŭ ili falus en la miron, en kiun la aliaj falis, ĉar ne alia afero estis ebla: per tia lerteco kaj ordo ĝi estis fabrikita. La unua, kiu iris al la orelo de la kapo, estis Don Antonio mem, kaj li diris per respektplena voĉo sed ne tiel mallaŭte, ke de ĉiuj ĝi ne estus aŭdebla: „Diru al mi, kapo, per la povo, kiu en vi estas, kiujn pensojn mi havas nun?“ Kaj la kapo respondis, nemovante la lipojn, per voĉo klara kaj malkonfuzita, tiamaniere ke ĉiu aŭdis ĝin, la jenan frazon: „Mi ne juĝas pri pensoj.“ Aŭdintion, ĉiu restis mirigita, plie vidante ke en la tuta salono, nek ĉirkaŭ la tablo estas homa persono, kiu povas respondi. „Kiomaj ni estas ĉi tie?“ redemandis Don Antonio; kaj estis al li respondite sammaniere: „Estas tie ĉi vi kaj via edzino, kun du amikoj viaj kaj du amikinoj siaj, kaj fama kavaliro nomita Don Kihoto de la Manĉo, kaj lia armpaĝio, kies nomo estas Sanĉo Panco.“ Tie ĉi ja oni denove miris; tie ĉi ja pro timo la haroj starigis al ĉiuj. Kaj Don Antonio, malproksimiĝante de la kapo, diris: „Tio ĉi sufiĉas por certigi min, ke mi ne estis trompita de tiu, kiu vendis al mi vin, kleran kapon, parolantan kapon, respondeman kaj mirindan kapon. Alia alvenu, kaj li demandu ĝin pri tio, kion li volos.“

Kaj tial, ke la virinoj estas rapidemaj kaj

scivolemaj, la unua kiu aliris, estis unu el la ambaŭ amikinoj de la edzino de Don Antonio, kaj, kion ŝi demandis, estis: „Diru al mi, kapo: kion mi faros por esti belega?“ Kaj estis al ŝi respondite: „Estu tre honesta.“ „Mi ne demandas vin plu,“ diris la demandantino. Aliris tuj la kunulino kaj ŝi diris: „Mi deziras scii, kapo, ĉu mia edzo amas min bone aŭ ne.“ Kaj al ŝi oni respondis: „Vidu, kiel li agas al vi, kaj vi mem povos juĝi.“ La edzinigita virino apartiĝis dirante: „Tiu ĉi respondo ne bezonis demandon, ĉar efektive la agoj, kiujn oni faras, montras la volon de tiu, kiu faras ilin.“ Aliris tuj unu el la amikoj de Don Antonio kaj demandis ĝin: „Kiu estas mi?“ kaj estis al li respondite: „Vi tion ja scias.“ „Mi ne demandas tion ĉi — respondis la sinjoro — sed, vi diru al mi, ĉu vi konas min.“ „Jes, mi konas — al li oni respondis —, vi estas Don Pedro Noriz.“ „Mi ne volas pli multe scii, ĉar tio ĉi sufiĉas por komprenigi, ho kapo, ke vi scias ĉion.“ Kaj kiam li estis foririnta, aliris la alia amiko kaj demandis: „Diru al mi, kapo: kiujn dezirojn havas mia filo la unuanaskito?“ „Mi jam diris — oni respondis —, ke mi ne juĝas dezirojn; sed malgraŭ ĉio, mi povas diri, ke tiu, kiun via filo havas, estas enterigi vin.“ „Tio estas; — diris la sinjoro, kion mi vidas per la okuloj, tion mi palpas per la fingroj kaj mi ne demandas plu.“ Alvenis tien la edzino de Don Antonio kaj diris: „Mi ne scias, kapo, pri kio demandi vin; nur mi deziras scii, ĉu mi ĝuos multajn jarojn je mia bona edzo“ kaj oni al ŝi respondis: „Jes, vi ĝuos, tial ke lia sano kaj sobrega vivmaniero promesas multajn jarojn da vivo, kiun multaj mallongigas per sia malsobrego.“ Alvenis

tuj Don Kihoto kaj li diris: „Diru al mi, vi, kiu respondas, ĉu estis vero ĉu sonĝo tio, kio okazis al mi en la groto de Montesino? ĉu estas certaj la skurgatoj de Sanĉo, mia armpaĝio? ĉu efektivigos la sensorĉigo de Dulcineo?“

„Rilate al la groto, — oni respondis, — estas multo por diri: ĝi havas ion el ĉio; la skurgado de Sanĉo iros malrapide; la sensorĉigo de Dulcineo fariĝos siatempe.“ „Mi ne deziras scii ion plian; — diris Don Kihoto — kiam mi nur vidos Dulcineon sensorĉigita, mi imagos, ke subite prosperos al mi ĉiuj aventuroj, kiujn mi povos deziri.“ La lasta demandinto estis Sanĉo kaj, kion li demandis estis: „Okaze, kapo, ĉu mi havos alian reglandon? ĉu mi eliros el mia kondiĉo de armpaĝio? ĉu mi revidos mian edzinon kaj miajn filojn?“ Al li oni respondis: „Vi regos en via hejmo, kaj se vi tien revenas, vi revidos edzinon kaj filojn, kaj lasinte la servadon, vi ne plu estos armservisto.“ „Bone; pro Dio, — diris Sanĉo Panco, — tion ĉi mi ja estus dirinta al mi; ne dirus pli multe la profeto Perogrullo.“*) „Besto, — diris Don Kihoto, — kion vi volas, ke oni respondu al vi? Ĉu ne sufiĉas, ke la respondoj, kiujn tiu ĉi kapo donis, korespondis al tio, pri kio vi demandis?“ „Jes, sufiĉas, — respondis Sanĉo, — sed mi volas, ke ĝi pli klariĝu, kaj pli diru.“

Ĉe tio ĉi finiĝis la demandoj kaj respondoj, sed ne finiĝis la miro, kuu kiu restis ĉiuj, escepte la du amikoj de Don Antonio, kiuj konis la artifikon. Cide Hamete Benengeli bonvolis

*) Fiktiva, ridinda persono, kiu klarigas klarajn aferojn, kaj pri kiu oni diras, ke li „nomas pugno la fermitan manon“.

ĝin tuj klarigi por ne mirigi la mondon per la kredo, ke ia sorĉa kaj eksterordinara mistero estas entenata en tia kapo: tiel, li diris, ke Don Antonio Moreno, imitante alian kapon, kiun li vidis en Madrido ĉe la domo de skulptisto, konstruis ĉi-tiun ĉe li por amuzigi kaj mirigi la nesciulojn; kaj la fabrikaĵo estis jena: La supraĵo de la tablo estis el ligno pentrita kaj lakita kvazaŭ jaspo; kaj la piedestalo sur kiu ĝi staris estis el sama materio, kun kvar piedoj de aglo, kiuj aliĝis el ĝi por pli bona firmeco. La kapo, kiu ŝajnis medalo kaj figuraĵo de roma imperiestro kaj estis bronzkolora, estis tute kava, same kiel la supraĵo de la tablo, al kiu ĝi aliĝis tiel ĝuste ke nenia fendo estis videbla. La piedo de la tablo estis ankaŭ kava, kaj komuniĝis kun la gorgo kaj brusto de la kapo; kaj ĉio ĉi korespondis al alia apartamento, kiu estis sub la salono. Tra la tuta kavajo de piedo, tablo, gorgo kaj brusto de la nomita medalo kaj figuraĵo, trairis zorge fiksita tubo el lado, kiu estis videbla de neniu. En la malsupra apartamento korespondanta al la supra, estis la persono, kiu devis respondi, kun la buŝo ĉe la tubo mem, tiamaniere ke, kvazaŭ per blovpafilo, iradis la voĉo supre malsupren kaj malsupre supren, en vortoj elparolitaj kaj klaraj, kaj tiel estis neeble rekoni la trompon. Unu nevo de Don Antonio, sprita kaj inteligenta studento, estis la respondanto, kiu sciigita de sia onklo pri tiuj, kiuj en tiu tago devis kun li eniri en la salonon de la kapo, povis facile ĝuste kaj akurate respondi la unuan demandon; la aliajn li respondis per konjektoj kaj saĝe kiel saĝulo. Kaj plie, diras Cide Hamete, ke la elmonro de tiu ĉi mirinda

maŝino daŭris dek aŭ dekdu tagojn, sed ĉar disvastigis tra la urbo la famo, ke Don Antonio havis ĉe si ensorĉitan kapon, kiu respondas al ĉiu demandinto, li mem timis ke tio alvenos al la aŭdado de la viglaj gardstarantoj de nia fido, kaj avizis pri la afero la sinjorojn inkvizitorojn. Oni ordonis lin, ke li ĝin detruu kaj ke li ne plu daŭrigu, por ke la malklera popolo ne skandaligu. Sed, en la opinio de Don Kihoto kaj de Sanĉo Panco, la kapo restis ensorĉita kaj respondema, kun pli da kontenteco ĉe Don Kihoto ol ĉe Sanĉo.

La sinjoroj de la urbo, por fari plezuron al Don Antonio, festi Don Kihoton kaj obliĝi ke tiu ĉi montru siajn malsaĝaĵojn, ordonis ke oni faru post ses tagoj turniron, kiu ne efektiviĝis pro la okazaĵo pri kiu oni parolos poste.

Subite deziris Don Kihoto promeni en la urbo senceremonie kaj piede, pro timo ke se li rajdos sur ĉevalo la buboj persekutos lin, kaj tial, li kaj Sanĉo kun aliaj du servistoj, kiujn Don Antonio donis al li, ili eliris promeni. Okazis ke, irante tra strato, Don Kihoto levis la okulojn kaj vidis skribitan per tre grandaj literoj: „Tie ĉi oni presas librojn.“ Pro tio li multe kontentiĝis ĉar ĝis tiam li nenian presejon vidis, kaj li deziris scii kiel ili estas. Li eniris kun sia tuta akompano, kaj li vidis presi en unu loko, korekti en alia, komposti en tiu ĉi, reformi en tiu, kaj unuvorte la tutan aparaton, kiu en la grandaj presejoj elvidiĝas.

Alproksimiĝis Don Kihoto al kesto, kaj li demandis pri kio estas, kion oni tie faras: la oficistoj klarigis la aferon al li, li miris kaj iris antaŭen. Alvenis Don Kihoto al unu oficisto, kaj li demandis lin kion li faras.

La oficisto respondis: „Sinjoro, tiu sinjoro, kiu ĉi tie estas (kaj li montris al li viron de bona kresko kaj aspekto, kaj iom gravan) tradukis toskanan verkon en nian kastilan lingvon, kaj mi kompostas ĝin por enpresi. „Kiun titolon havas la libro?“ demandis Don Kihoto. Al tio respondis la aŭtoro: „Sinjoro, en toskana la libro estas nomata *Le bagatelle*.“ „Kaj kion signifas *Le bagatelle* en nia kastila lingvo?“ demandis Don Kihoto. „*Le bagatelle*, — diris la aŭtoro — estas kvazaŭ ni dirus kastile: la ludiloj; kaj kvankam tiu ĉi libro estas, laŭ la nomo, humila, ĝi enhavas kaj enfermas en si tre bonajn kaj substancozajn aferojn.“ „Mi, — diris Don Kihoto — konas iom da toskana lingvo kaj eĉ mi povas deklami kelkajn stancojn de Ariosto. Sed, diru al mi via Moŝto, (kaj mi ne demandas vin pro tio, ke mi volas ekzameni la kapablon de via Moŝto, sed nur pro scivolemo), ĉu vi trovis en via skribajo iajoje la vorton *pignata*?“ „Jes, multajn fojojn,“ respondis la aŭtoro. „Kaj kiel via Moŝto tradukas ĝin kastile?“ demandis Don Kihoto. „Kiel vi volas ke mi traduku ĝin, — rediris la aŭtoro — se ne per poto?“ „Korpo de Dio! — diris Don Kihoto — kiel progresinta vi estas en la toskana lingvo! Mi vetus bonan veton, ke kie estas toskane dirite *piace*, via moŝto kastile tradukas plaĉas, kaj kie oni diras *piu*, vi diras pli, kaj *su* vi tradukas per supre, kaj *giu* per malsupre.“ „Jes, estas certe, — diris la aŭtoro, — ĉar tiuj estas la respondantaj vortoj.“ „Mi kuraĝas juri, — diris Don Kihoto, — ke via Moŝto ne estas konata en la mondo, kiu ĉiam malŝatas premii la eminentajn geniojn kaj la laŭdindajn labor-

ojn. Kiom da lertecoj ĉie perditaj! Kiom da genioj lasitaj flankel! Kiom da malestimitaj virtoj! Sed, kun ĉio ĉi, ŝajnas al mi, ke traduki de unu al alia lingvo, se oni ne tradukas de la greka kaj latina (reĝoj de la lingvoj), estas kvazaŭ rigardi la flandrajn tapiŝojn ĉe la dorsa flanko; kvankam oni vidas la figuraĵojn, ili estas plenaj da fadenoj, kiuj malklarigas ilin, kaj oni ilin ne vidas kun la heleco kaj perfekteco de la supra flanko. Traduki el facilaj lingvoj montras nek genion nek belstilon, tute kvazaŭ oni kopius de unu papero sur alian. Ne per tio mi volas dedukcii, ke ne estas laŭdinda la traduklaborado, ĉar homo povas sin okupi en aliaj pli malbonaj aferoj kaj kiuj pli malmultan profiton al li alportas. Esceptoj en tiu ĉi kalkulo, estas la du famaj tradukintoj, unu, Doktoro Christobal de Figueroa en sia *Pastor Fido*, kaj alia, Don Juan de Jáuregui en sia *Aminta*. Ambaŭ feliĉe sukcesis lasi dubon pri kio estas la traduko kaj kio — la originalo. Sed, diru al mi, via Moŝto, ĉu tiu ĉi libro estas presita je via propra kalkulo, ĉu vi jam vendis al iu libristo la privilegion? „Mi presigas ĝin je mia kalkulo, — respondis la aŭtoro, — kaj mi kredas gajni almenaŭ mil dukatojn per tiu ĉi unua eldono, kiu estos da du mil ekzempleroj, kaj kiuj elvendiĝos po ses realoj kontantaj.“ „Bone konas via Moŝto la kalkulon, respondis Don Kihoto; — oni bone vidas, ke vi ne konas la enspezojn kaj elspezojn de la presistoj kaj la rilatojn, kiuj estas inter unuaj kaj aliaj. Mi promesas al vi, ke kiam vi vidos vin ŝargĵitan per mil korpoj de libroj, vi vidos vian korpon tiel muelitan, ke vi timiĝos, kaj multe pli, se la verko estas iom fuŝita kaj neniom

sprita.“ „Kio do! — diris la aŭtoro, — ĉu vi volas, ke mi donu ĝin al libristo, kiu donos al mi por la privilegio tri maravedisojn, kaj ankoraŭ li kredos favori min per ili? Mi ne presigas miajn librojn por atingi pli da famo en la mondo, ĉar mi jam estas konata pro miaj verkoj; profiton mi volas, ĉar sen ĝi la bona famo ne valoras eĉ speson.“ „Dio donu al vi bonan sorton“ — respondis Don Kihoto. Li pasis antaŭen al alia skatolo, kie li vidis, oni estas korektanta kajeron de libro titolita *Lumo de l' animo*, kaj vidinte ĝin, li diris: „Tiaj verkoj, kvankam jam ekzistas multaj el tiu ĉi speco, estas, kiujn oni devas enpresi, ĉar estas multaj la pekuloj kaj estas necesaj sennombraj lumoj por tiom da senlumigitoj.“ Li pasis antaŭen kaj li vidis, ke ankaŭ oni estas korektanta alian libron, kaj demandinte pri la titolo, oni al li respondis ke ĝi estas nomata: „Dua parto de la sprita junkro Don Kihoto de la Manĉo“ verkita de iu najbaro de Tordesillas. „Mi jam havas sciigon pri tiu ĉi verko, — diris Don Kihoto; — kaj vere kaj en mia konscienco mi kredis, ke ĝi jam estis bruligita kaj pulvorigita pro sia senhonteco; sed la tago de Sankta Martino alvenos por ĝi kiel por ĉiu porko: La fikтивaj historioj des pli estas bonaj kaj amuzaj, ju pli ili alproksimiĝas al la vero aŭ al la simileco de la vero; kaj la veroj des pli estas bonaj, ju pli ili estas veraj.“ Kaj tion ĉi dirinte, kun montrado de ia kolero, li eliris el la presejo. La saman tagon Don Antonio ordonis, konduki lin, vidi la galerojn, kiuj estas ĉe la marbordo; pri kio Sanĉo multe ĝojis tial, ke dum sia tuta vivo li neniam vidis ilin. Avertis Don Antonio la

galereŝtron, ke posttagmeze li kondukos, por vidi ilin, sian faman gaston Don Kihoton de la Manĉo, pri kiu la galereŝtro kaj ĉiu loĝanto de la urbo havis jam sciigon; kaj tion, kio okazis en la galeroj, oni diros en la sekvanta ĉapitro.

Ĉapitro LXIII.

Pri la malbono, kiu okazis al Sanĉo Panco dum la vizito al la galeroj kaj pri la nova aventuro de la bela maŭridino.

Grandaj estis la rezonadoj, kiujn Don Kihoto faradis pri la respondoj de la ensorĉita kapo, sen ke iu el ili eltrovu la trompon; kaj ĉiuj rezonadoj finiĝis kun la promeso, kiun li kredis vera, pri la sensorĉigo de Dulcineo. Tie li iradis, venadis kaj gajiĝadis en si mem, kredante ke li baldaŭ vidos la plenumon; kaj Sanĉo, kvankam li malamegis esti provinĉestro, kiel estas dirite, deziris ankoraŭ regi kaj esti obeita: ĉar tiun ĉi malbonon kunportas kun si la regado eĉ kiam ĝi estas fiktiva. Laŭ decido, tiun posttagmezon Don Antonio, la gastiganto, kaj liaj du amikoj kun Don Kihoto kaj Sanĉo, iris al la galeroj. La galereŝtro estis gajega pro sia bona sorto, vidi la tiel multefamajn Don Kihoton kaj Sanĉon. Apenaŭ ili alvenis al la marbordo, ĉiuj galeroj mallevis la tendojn kaj la flutoj sonoradis; oni lanĉis al la akvo laŭ boaton kovritan de riĉaj tapiŝoj kaj de kusenoj el karmezin-kolora veluro, kaj tuj, kiam Don Kihoto estis metinta la piedojn en ĝin, la ĉefa

ŝipo pafgis la ĉefkanonon, kaj same pafis la aliaj galeroj; kaj, kiam Don Kihoto supreniris la dekstran ŝtuparon, la tuta kanajlaro*) salutis lin, kiel estas kutimo, kiam eminenta persono eniras en la galeron, dirante: hu, hu, hu, tri fojojn. Donis al li la manon la generalo, kiun per tiu nomo ni nomos, kaj kiu estis ĉefa sinjoro valencia. Li ĉirkaŭprenis Don Kihoton dirante al li: „Tiun ĉi tagon mi markos per blanka ŝtono, tial ke ĝi estas unu el la plej bonaj de mia vivo ĉar mi vidis Sinjoron Don Kihoton de la Manĉo, tipo kaj signo, kiu montras al ni, ke en li entenigas kaj kuŝas la tuta valoro de la migranta kavaliraro.“ Per aliaj ne malpli afablaj rezonoj respondis al li Don Kihoto tre ĝoja, vidante sin tiel ĉef-sinjore regalita. Ĉiuj eniris en la poŭpon, kiu estis tre bone ornamita, kaj ili sidiĝis sur la randbenkojn: la submajstro iris al la rembenkoj, kaj li signalis per la fajfilo, ke la kanajlaro forigu siajn vestojn; afero, kiu estis farita en unu momento. Sanĉo, kiu vidis tiom da homoj nudaj, restis mirigita, des pli kiam li vidis starigi tendon tiel rapide, ke al li ŝajnis, ke ĉiuj diabloj tie laboras; sed ĉio ĉi estis bagatelo apud tio, kion mi diros nun. Sanĉo sidis sur la tendostango apud la dekstra malantaŭa remisto, kiu avertita pri tio, kion li devis fari, kaptis Sanĉon, kaj levis lin per la brakoj; poste la tuta kanajlaro staranta, vigla, komencinte ĉe la dekstra flanko, transdonis kaj turnis lin de benko al benko tiel rapide, ke la malfeliĉa Sanĉo perdis la

*) Oni nomis kanajlaro (*chusma* gento malnobla, kanajla, mizera) la kondamnitaron, kiu remis en la galeroj.

vidadon de siaj okuloj, kaj sendube pensis, ke ĉiuj diabloj lin forportas; kaj ili nur ĉesis, kiam ili revenigis lin tra la maldekstra flanko, kaj lin demetis en la poŭpon. Restis li malfeliĉa, muelita, spireganta kaj traŝvitanta, ne povante imagi tion, kio al li okazis. Don Kihoto, kiu vidis la senflugilan flugadon de Sanĉo, demandis la generalon, ĉu tiuj estas ceremonioj, kiujn oni uzas kun la unuaj, kiuj eniras en la galerojn, ĉar se okaze tio estas vero, li, kiu tute ne intencas promociiĝi en ili, ne volas fari tiajn ekzercojn. Li juris pro Dio, ke se iu ekkaptos lin por lin turni, li formetos de li la animon per trapikoj; kaj tion dirinte, li starigis kaj pugneprenis la spadon. En tiu ĉi momento oni mallevis la tendon kaj kun grandega bruo oni faligis la antenon supre-malsupren. Sanĉo pensis, ke la ĉielo eligas el siaj fundamentoj, ke ĝi falas sur lian kapon, kaj kaŭrante, li plena de timo ĝin metis inter siajn krurojn. Ne estis tute trankvila Don Kihoto, kiu ankaŭ ektemis kaj malŝtreĉis la ŝultrojn kaj perdis la koloron de la vizago. La kanajlaro levis la antenon kun sama rapideco kaj bruo kun kiuj ili malsuprenigis ĝin; kaj tio-ĉi, en silento, kvazaŭ ili ne havus voĉon nek vivon. La submajstro faris signalon, ke oni suprenigu la ankron, kaj saltante inter la benkaron, kun la nervoskurĝo aŭ batŝnuro, li ekvapis la ŝultrojn de la kanajlaro kaj la ŝipo forigis iom post iom al la maro. Kiam Sanĉo vidis tiom da moviĝantaj ruĝaj piedoj (ĉar li pensis ke la remiloj estas piedoj), li diris en si mem: „Tio-ĉi ja estas vere ensorĉita afero kaj ne tio, kion mia majstro rakontas. Kion faris tiuj-ĉi malfeliĉuloj, ke oni ilin tiel skurĝis? kaj kiel tiu-

ĉi sola viro, kiu tie iradas fajfante, havas kuraĝon skurĝi tiom da homoj? Nun mi diras, ke tio-ĉi ja estas la infero, aŭ almenaŭ la purgatorio.“ Don Kihoto, kiu vidis la atenton, kun kiu Sanĉo rigardis la okazantaĵojn, diris al li: „Ha, Sanĉo amiko, kun kia facileco kaj malkareco vi povus, vi se vi volus, senvestigi la supran duon-parton de via korpo, vin meti inter tiuj-ĉi sinjoroj, kaj fini la sensorĉigon de Dulcineo! ĉar kun la mizero kaj sufero de tiom da homoj vi ne tro sentus la vian; kaj plie povus okazi, ke la saĝulo Merlin kalkulu ĉiun el tiuj-ĉi batoj, pro tio ke ili estas donitaj de bona mano, po dek batoj el tiuj, kiujn vi devus doni mem.“

La generalo volis demandi pri kiuj estas tiuj skurĝbatoj kaj tiu sensorĉigo de Dulcineo, kiam la maristo diris: „Montjuich signalas, ke estas remŝipo en la marbordo ĉe la okcidenta flanko.“ Tion ĉi aŭdinte, la generalo saltis al la benkaro kaj diris: „Nu! miaj filoj, ke ĝi ne forkuru de ni: ia korsara brigedo el Algerio nepre estas tiu, kiun la observejo signalas al ni.“ Alproksimiĝis poste la aliaj tri galeroj al la ĉefa por scii, kion al ili oni ordonas. Komandis la generalo, ke du el ili eliru al la maro, kaj li kun la alia aliros laŭlonge la bordon, ĉar tiamaniere, la vezelo ne forkuros de li. La kanajlaro premis la remilojn, ŝovante la galerojn tiel furioze ke ŝajnis, ili flugadas. Tiuj, kiuj foriris al la maro, ekvidis je du mejloj proksimume vezelon, kiun laŭvide ili juĝis dekkvar-aŭ dekkvinbenka, kaj tiel estis la vero, kaj kiam la vezelo ekvidis la galerojn ĝi sin pretigis por forkuri, kun intenco kaj espero utiligi sian rapidecon. Sed okazis al ĝi male, ĉar la ĉefa galero estis unu el la plej rapidaj, kiuj en la

maro veturas, kaj ĝi tiel kuris, ke tiuj de la vezelo klare vidis, ke ili ne povas forkuri kaj tial la ŝipestro ordonis, ke oni lasu la remilojn kaj ke oni kapitulacu, por ne kolerigi la kapitanon, kiu niajn galerojn regis. Sed la sorto, kiu alimaniere tion gvidis, ordonis, kiam la ĉefgalero alvenis tiel proksime, ke oni povis en la vezelo aŭdi la voĉojn dirantajn ke ili kapitulacu, du toraquis, tio estas kvazaŭ diri, du ebriaj turkoj, kiuj en la vezelo venis kun aliaj dekdu, pafis du pafilojn, kaj mortigis du soldatojn, kiuj estis sur la randoj de niaj galeroj.

Tion vidinte, juris la generalo lasi kun vivo nenion el tiuj, kiujn li kaptos en la vezelo, kaj atakante ĝin kun ĉiu forto, ĝi forŝoviĝis sub la remilaro. Pasis la galero antaŭen grandan spacon; tiuj de la vezelo sin juĝis perditaj, kaj ili suprentiris velon dum la galero revenis, kaj denove, per veloj kaj remiloj ili sin pretigis al forkurado. Sed ne tiom profitis al ili ilia diligenteco, kiom malutilis al ili ilia troriskemo, ĉar la ĉefgalero atingis ilin post ne pli ol duono da mejlo, ĝi jetis sur ilin la remilaron, kaj kaptis ilin ĉiujn vivantajn. Alvenis dume la aliaj du galeroj, kaj ĉiuj kvar kun la kaptitajo revenis ĉe la marbordo, kie sennombra popolamaso estis atendanta ilin, dezirante vidi, kion ili kunportas. La generalo ankrumis apud la marbordo kaj li eksciis, ke ĉeestas sur la bordo la vicreĝo de la urbo. Li ordonis lanĉi la boaton por alporti lin, kaj malsuprenigi la antenon por tuj pendigi la araban ŝipestron kaj la aliajn turkojn, kiujn li kaptis en la vezelo, kaj kiuj estis ĝis tridek-ses personoj, ĉiuj belaj kaj la plimulto turkaj pafilistoj. Demandis la generalo, kiu estas la kapitano de la ŝipo, kaj

respondis al li, en kastila lingvo, unu el la kaptitoj (kiu poste aperis kiel hispana renegato): „Tiu ĉi knabo, sinjoro, kiun tie ĉi vi vidas, estas nia kapitano“ kaj li montris unu el la plej belaj knaboj, kiun povas pentri la homa imagado. Lia aĝo, ŝajne, ne atingis la dudekan jaron. La generalo demandis lin: „Diru al mi, malbone konsilita hundo, kiu instigis vin, mortigi miajn soldatojn, kiam vi mem vidis, ke estis neeble forkuri? Ĉu tiun ĉi respekton oni havas al la ĉefgaleroj? Ĉu vi nescias, ke troriskeno ne estas kuraĝo? La dubaj esperoj devas igi la virojn sentimaj sed ne troriskenaj.“ La araba ŝipestro volis respondi, sed la generalo ne povis tiam aŭdi la respondon, pro tio ke li iris akcepti la vicreĝon, kiu jam eniris en la galeron, kun kelkaj el liaj servistoj kaj kelkaj personoj de la urbo. „Ĉu bona estis la ĉasaĵo, Sinjoro generalo?“ — diris la vicreĝo. „Tiel bona, — respondis la generalo, — kiel vi ĝin vidis nun pendantan de tiu ĉi anteno.“ „Kial do?“ — rediris la vicreĝo. „Tial ke ili mortigis al mi, — respondis la generalo, — kontraŭ ĉiu leĝo kaj kontraŭ ĉiu milita rajto kaj kutimo, du soldatojn el la plej bonaj, kiuj en tiuj ĉi galeroj venis, kaj mi ĵuris, pendigi ĉiujn, kiujn mi kaptis, precipe tiun ĉi knabon, kiu estas la estro de la vezelo.“ Kaj li montris tiun, kiu jam havis la manojn kunligitajn kaj la ŝnuron jetitan ĉirkaŭ la kolo, atendante la morton. Rigardis lin la vicreĝo, kaj vidante lin tiel belan, belkreskan kaj humilan, — lia belegeco, donante al li mem en tiu momento, leteron de rekomendo, — li ekdeziris savi lin de la morto, kaj tiel diris: „Diru al mi, araba ŝipestro: ĉu vi estas turko maŭro aŭ

renegato?“ Al kio respondis la knabo en lingvo ankaŭ kastila: „Mi estas nek turko, nek maŭro, nek renegato.“ „Kio vi estas, do?“ redemandis la vicreĝo. „Virino kristanino“ respondis la junulo. „Ĉu virino kaj kristanino en tiuj vestaĵoj kaj en tiuj okazaĵoj? Tio estas afero pli admirinda ol kredinda.“ „Haltigu, — diris la junulo — mian ekzekuton, ĉar oni ne multe perdos prokrastante vian venĝon ĝis kiam mi estos rakontinta al vi mian vivon.“

Kiu koro estus tiel malmola ke per tiuj ĉi paroloj ĝi ne moligus, almenaŭ nur por aŭdi la rakonton de la malgaja kaj ĉagrena knabo? La generalo diris al li, ke li diru, kion li volos, sed ke li ne esperu atingi pardonon pri sia flagranta kulpo. Kun tiu ĉi permeso la knabo ekdiris tiamaniere:

„En tiu nacio pli malfeliĉa ol prudenta, sur kiun pluvis maro da malfeliĉaĵoj, mi naskiĝis kreita de gepatroj maŭridoj. En la fluo de ilia malfeliĉo, mi estis alkondukita de du onkloj miaj al Berberio, kaj neniel utilis al mi diri, ke mi estas kristanino, kiel efektive mi estas, kaj ne el la fiktivaj kaj ŝajnaj kristaninoj sed el la veraj kaj katolikaj. Ne utilis al mi, antaŭ tiuj, kiuj zorgis por nia mizera ekzilo, diri tiun veron, nek miaj onkloj volis kredi min, sed ili, male, juĝis ĝin kiel mensogon kaj elpensajon mian por resti en la lando, kie mi naskiĝis. Tiel pli perforte ol per mia volo, ili kunportis min kun si. Mi havis kristanan patrinon kaj ne malpli kristanan, saĝan patrou; mi mamsuĉis la katolikan fidon kun la lakto; mi edukigis en la bonaj moroj; kaj nek per la moroj nek per la lingvo, laŭ mia opinio, mi ŝajnis esti maŭridino. Kun tiuj ĉi virtoj, —

kiujn mi juĝas tiaj, — kreskis mia beleco, se mi ian belecon havas; kaj kvankam mia mallibereco kaj kaŝiteco estis severaj, ili ne estis tiaj, ke ne havu la okazon vidi min sinjoro ĵunkro nomita Don Gaspar Gregorio, unua filo de sinjoro, kiu apud nia lando posedajon havas. Kiel li vidis min, kiel ni interparoladis, kiel li sin vidis amplenan por mi, kaj mi ne tro gajnititan de li, estus tro longe rakonti; des pli, ke mi timas, ke inter la lango kaj la gorgo intermetiĝos la rigora ŝnuro, kiu minacas min; tial mi nur diros ke, en nia ekzilo, Don Gregorio volis akompani nin. Li intermiksiĝis kun la maŭrido, kiuj eliris el aliaj lokoj, — ĉar li bonege konis la lingvon, — kaj dum la vojaĝo, li fariĝis amiko de la du onkloj, kiuj kun si kunportis min; ĉar mia patro, singardema kaj antaŭavizita, tuj kiam li aŭdis la unuan edikton de nia ekzilo, foriris el la lando, kaj iris serĉi iun, kiu, en fremda lando, akceptos nin. Li lasis enfermitajn kaj enterigitajn en unu loko, pri kiu scias nur mi, multajn perlojn kaj multvalorajn ŝtonojn kun kelke da mono en ormoneroj. Li ordonis min, tuŝi neniel la trezoron, kiun li lasis, se okaze oni ekzilus nin antaŭ lia reveno. Mi tiel faris, kaj kun miaj onkloj, kiel mi diris, kaj aliaj parencoj kaj proksimuloj ni transiris al Berberio, kaj la loko kie ni loĝiĝis, estis Alĝero, tute kvazaŭ ni estus loĝiĝintaj en la infero mem. Havis pri mia beleco sciigon la reĝo, kaj la famo informis lin pri miaj riĉaĵoj, afero, kiu parte estis por la bono mia. Li vokis min antaŭ sin; li min demandis, de kiu parto de Hispanujo mi estas kaj kiom da moneroj kaj juveloj mi kunportas. Mi diris al li la lokon kaj, ke la juveloj kaj

moneroj restis tie enterigitaj, sed ke kun facileco oni povus ilin rehavi, se mi mem revenus serĉi ilin. Ĉion ĉi mi diris timante, ke pli ol lia avideco blindigu lin mia beleco. Kiam mi estis kun li en tiu-ĉi parolado, oni alvenis diri, ke kun mi venis unu el la plej belaj kaj graciaj junuloj, kiun oni povas imagi. Poste mi aŭdis, ke oni parolas pri Don Gaspar Gregorio, kies beleco estas pli granda ol la pli grandaj, kiujn oni povas laŭdi. Mi perturbigis, konsiderante la danĝeron, kiun kuras Don Gregorio. Tial, ke ĉe tiuj barbaraj turkoj pli multe oni ŝatas belan knabon aŭ junulon ol la plej belan virinon, ordonis tuj la reĝo, ke oni alkonduku lin tien por vidi lin kaj li demandis, min ĉu estas vero tio, kion oni diris al li pri tiu junulo. Tiam, mi, kvazaŭ avizita de la ĉielo, diris al li, ke estas vero, sed ke mi sciigas lin, ke li ne estas viro sed virino kiel mi, kaj ke mi petegas lin, li lasu min iri vesti ŝin per ŝiaj propraj vestaĵoj por ke en ĉio ŝi montru sian belecon kaj ŝi kun pli malgranda ĝeno povu aperi antaŭ li. Li diris, ke mi iru kaj, ke alian tagon ni priparolos kiamaniere mi povos reveni en Hispanlandon por elpreni la kaŝitan trezoron. Mi parolis kun Don Gaspar, mi rakontis al li la danĝeron kiun li kuras, se li montras sin kiel viron; mi vestis lin kiel maŭrinon, kaj la saman posttagmezon mi alkondukis lin antaŭ la reĝon, kiu restis mirigita vidante lin kaj montris deziron ŝin gardi por ŝin prezenti al la Granda Sinjoro; kaj por eviti la danĝeron, kiun en la serajlo de liaj edzinoj li povos havi kaj timi de si mem, li ordonis meti ŝin en la hejmo de unu el la ĉefaj maŭrinoj por ke oni gardu kaj servu ŝin, kaj tien oni lin kondukis tuj. La bedaŭro,

kiun ni ambaŭ (mi ne povas nei, ke mi amas lin) havis pro tio, ni lasas al la konsiderado de tiuj, kiujn sin amante, estas apartigataj. Ordonis poste la reĝo, ke mi revenu en Hispanlandon per tiu ĉi vezelo, kaj ke akompanu min du turkoj, nome tiuj, kiuj mortigis viajn soldatojn. Venis ankaŭ kun mi tiu-ĉi hispana renegato — kaj ŝi montris la viron, kiu unue parolis — pri kiu mi bone scias, ke li estas kaŝita kristano, kaj ke li venas kun pli da deziro resti en Hispanlando ol reiri en Berberion. La ceteraj homoj de la vezelo estas maŭroj kaj turkoj, kiuj nur taŭgas por servi la remilojn. La du senrespektaj kaj avidaj turkoj ne obeis la ordonon, kiun ili ricevis: konduki min sur hispanan teron kune kun ĉi tiu renegato kun la kristanaj vestaĵoj; ili volis unue balai tiun ĉi marbordon kaj fari kaptitaĵon se eble, ĉar ili timis, ke se ili tuj lasus nin sur la lando, ni povus malkovri per ia okazintaĵo, ke la vezelo restas en la maro, kaj se galeroj estus ĉe la marbordo, ili povus kapti ĝin. Hieraŭ nokte, ni ekvidis ĉi tiun sablaron, kaj nesciante pri tiuj ĉi kvar galeroj ni estis malkovritaj, kaj okazis al ni, kion vi vidis. Fine, Don Gregorio restas kun virina kostumo inter virinoj, en danĝero certe pereii kaj mi vidas min kun la manoj kunligitaj, atendante, aŭ pli bone, timante perdi la vivon, kiu jam lacigas min. Jen estas, sinjoroj, la fino de mia bedaŭrinda historio, tiel vera kiel malfeliĉa: mi nur petegas de vi, ke vi lasu min morti kiel kristanino, ĉar, kiel mi diris, en nenio mi estas kulpa pri la eraro, en kiun falis mia lando.“ Kaj tuj ŝi silentis, kun la okuloj gravedaj je tendraj larmoj, kiujn akompanis multaj de la ĉeestantoj. La vicreĝo,

kortuŝita kaj kompatema, nenion dirante alproksimiĝis al ŝi kaj formetis per siaj manoj la ŝnuron, kiu kunligis la belajn manojn de la maŭrino. Dum la kristana maŭridino rakontadis sian mirindan historion, fikse rigardadis ŝin maljuna pilgrimanto, kiu eniris en la galeron kun la vicreĝo. Apenaŭ la maŭridino finis sian paroladon, li sin ĵetis al ŝiaj piedoj, kaj ilin ĉirkaŭpremante, li per vortoj interrompitaj de mil ekploroj kaj ekĝemoj, diris al ŝi: „Ho, Ana Felix, malfeliĉa filino mia, mi estas via patro Ricote, kiu revenis por renkonti vin, ne povante vivi sen vi, kiu estas mia animo.“ Ĉe tiaj vortoj, Sanĉo malfermis la okulojn kaj levis la kapon, kiun li tenis klinitan pensante pri la malfeliĉeco de sia promenado. Rigardinte la pilgrimanton, li rekonis lin kiel la saman Ricote, kiun li renkontis la tagon, kiam li forlasis la reglandon. Tio firmiĝis, ke ŝi estas lia filino, kiu — jam malligita — ĉirkaŭprenis sian patron, miksante siajn larmojn al la liaj. La patro diris al generalo kaj al vicreĝo: „Jen, sinjoroj, estas mia filino, pli malfeliĉa laŭ siaj okazintaĵoj ol laŭ sia nomo. Ana Felix, ŝi estas nomata, kun la surnomo Ricote, fama tiom pro sia beleco kiom pro mia riĉeco. Mi foriris el mia patrolando por serĉi en fremdaj regnoj, kiu volus gastigi kaj akcepti nin, kaj tiun mi trovis en Germanlando. Mi revenis en tiu ĉi kostumo de pilgrimanto por serĉi mian filinon, kun la akompano de aliaj germanoj kaj elterigi la multajn riĉaĵojn, kiujn mi lasis kaŝitajn. Mi ne renkontis mian filinon, sed mi trovis la trezoron, kiun mi forportas. Nun per la stranga cirkonstanco, kiun vi vidas, mi retrovas la trezoron, kiu plej riĉigas min: Mian amatan filinon. Se

nia malmulta kulpeco, ŝiaj larmoj kaj la miaj, povas por via justeco malfermi pordojn al la kompatemo, faru ĝin por ni. Neniam ni havis penson ofendi vin nek iel interkonsentis kun la intencoj de niaj kunuloj, kiuj tre juste estis ekzilitaj.“ Tiam diris Sanĉo: „Bone mi konas Ricoteon, kaj mi scias, ke estas vero, ke Ana Felix estas lia filino; sed en tiujn aliajn bagatelojn, pri iro kaj reveno, pri havo de bona aŭ malbona intenco, mi ne intermiksiĝas.“

Ĉiuj ĉeestantoj miris pri la okazintaĵo kaj la generalo diris: „Viaj larmoj ne lasis min plenumi mian ĵuron: vivu, bela Ana Felix, la jarojn de vivo, kiujn la ĉielo difinis al vi, kaj portu la punon de sia kulpo la senrespektuloj kaj sentimuloj, kiuj malbone agis.“ Kaj tuj li ordonis pendigi ĉe la anteno la du turkojn mortigintojn de la soldatoj; sed la vicreĝo petegis lin, ke li ne pendigu ilin tial, ke ilia ago estis pli frenezula ol kuraĝa. Agis la generalo kiel la vicreĝo petis: ĉar oni plenumas malbone la venĝojn kun malvarmiginta sango.

Ili zorgis tuj, por eltiri Don Gasparon el la danĝero, en kiu li restas. Ricote promesis pli ol du mil dukatojn da perloj kaj juveloj, kiujn li havis. Oni proponis multajn rimedojn, sed neniu estis tiel bona kiel tiu de la hispana renegato. Li diris, ke li reiros al Alĝero en malgranda sesbenka ŝipo, ekipita per kristanaj remistoj, ĉar li scias kie, kiel kaj kiam li povos elŝipiĝi, kaj ankaŭ ne ignoras la domon, kie Don Gaspar restadas. La generalo kaj la vicreĝo hezitis fidi al la renegato kaj konfidi al li la kristanojn, kiuj devos remi, sed Ana Felix garantiis lin, kaj Ricote, ŝia patro, diris, ke li donos le reaĉetmonon de la kristanoj, se okaze

ili perdiĝos. Post tiu ĉi decido, la vicreĝo elŝipiĝis, kaj Don Antonio Moreno prenis kun si la maŭridinon kaj ŝian patron, kun la peto de la vicreĝo, ke li ilin regalu kaj flegu kiel eble plej bone; li mem, de sia flanko, proponis ĉion, kio en lia hejmo taŭgos por ilia regalado: tioma estis la bonvoleco kaj kariteco, kiun la beleco de Ana Felix naskigis en lia brusto.

Ĉapitro LXIV.

Kiu traktas pri la aventuro, kiu, el ĉiuj ĝis nun okazintaj al li, kaŭzis pli da ĉagreno al Don Kihoto.

Rakontas la historio, ke la edzino de Don Antonio Moreno ricevis grandan kontenton vidante Anan Felix'on en sia hejmo. Ŝi akceptis ŝin kun plaĉo, tiel enamigita de ŝia beleco, kiel de ŝia diskreteco, ĉar ambaŭ ecojn posedis en alta grado la maŭridino; kaj ĉiuj personoj de la urbo, kvazaŭ vokitaj per alarmsignalo, venis vidi ŝin. Diris Don Kihoto al Don Antonio, ke la opinio, kiun ili akceptis, pri la liberigo de Don Gregorio, ne estas bona tial, ke ĝi estas pli danĝera ol konvena, kaj ke estus pli bone, se oni lasus lin kun armiloj kaj ĉevalo en Berberio, kaj li eltirus lin, spite la tuta maŭraro, same kiel faris Don Gaiferos kun sia edzino Melisendra. „Atentu, via Moŝto, — diris Sanĉo tion ĉi aŭdinte, — al tio, ke Sinjoro Don Gaiferos eltiris sian edzinon el firma lando, kaj alkondukis ŝin al Francujo tra lando firma. Sed tie ĉi, se okaze ni eltiras Don Gregorion,

ni ne havas landon, tra kiu alkonduki lin en Hispanujon, ĉar la maro kuŝas intere.“ „Por ĉio ekzistas rimedo, escepte por la morto, — respondis Don Kihoto, — ĉar post alveno de la ŝipo al la marbordo, ni povus enŝipiĝi eĉ se la tuta mondo tion malpermesus.“ „Tre bone pentras kaj faciligas la aferon via Moŝto, — diris Sanĉo; — sed de l' diro al la faro estas ŝtuparo, kaj mi gardas mian renegaton, kiu ŝajnas al mi bona homo kaj kun bonaj kvalitoj.“ Don Antonio diris, ke se la renegato ne prosperos, oni adoptos la rimedon, ke la grava Don Kihoto transpasu al Berberio. Post du tagoj, la renegato ekveturis per rapida ŝipo de ses remiloj po flanko, ekipita per kuraĝega remistaro, kaj post aliaj du tagoj la galeroj ekvojaĝis al Oriento. La generalo petis la vicreĝon, ke li bonvolu sciigi lin pri ĉio, kio okazos, pri la liberigo de Don Gregorio kaj pri la okazintaĵo de Ana Felix, kaj promesis la vicreĝo fari tiel.

Unu matenon Don Kihoto eliris promeni sur la marbordo, armita per ĉiuj armiloj, ĉar, kiel li ofte diradis, ili estas liaj jungiloj, kaj la batalado estas lia ripozo, kaj neniam li troviĝis sen ili eĉ unu solan momenton. Li vidis venantan al li kavaliron tute armitan, kiu portis sur la ŝildo pentritan helan lunon, kaj kiu, alveninte sufiĉe proksime por esti aŭdata, per laŭta voĉo, turnante sian parolon al Don Kihoto, diris: „Gloraj kaj neniam kiel li meritas laŭdata kavaliro Don Kihoto, mi estas la kavaliro de la Blanka Luno, kies neaŭditaj faroj eble jam alportis min al via rememoro: mi venas batali kun vi kaj provi la forton de viaj brakoj por konigi kaj konfesigi de vi ke mia Sinjorino,

kiu ajn ŝi estu, senkompare pli bela estas ol via Dulcineo de l'Toboso. Se vi tiun veraĵon konfesas tute simple, vi evitos vian morton kaj la laboron, kiun mi devos fari, por doni ĝin al vi. Se vi batalos kaj se mi venkos vin, mi ne volas alian kontentigon ol tiun, ke forlasante la armilojn kaj ne plu serĉante aventurojn, vi returnu kaj kaŝiĝu dum unu jaro en via vilaĝo, kie vi devos restadi, neniam prenante la spadon, en trankvila paco kaj profita kvieteco, ĉar tiel konvenas al la pligrandiĝo de via posedajo kaj al la savo de via animo. Se vi venkos min, mia kapo restos al via decido, kaj viaj estos la restaĵoj de miaj armiloj kaj ĉevalo, kaj pasos al via famo miaj faroj. Vidu, kio pli plaĉas al vi, kaj respondu al mi tuj ĉar nur la tutan hodiaŭan tagon mi havas kiel templinon por solvi tiun ĉi aferon.“

Don Kihoto restis duoble mirigita, tiel de la aroganteco de la Blanka-Lunulo, kiel de la motivo de l' invito al duelo, kaj kun trankvileco kaj severa gesto li respondis: „Kavaliro de la Blanka Luno, kies faritaĵoj ĝis nun ankoraŭ ne venis al mia aŭdado, mi igos vin juri, ke neniam vi vidis la faman Dulcineon, ĉar se vi estus vidinta ŝin, mi scias, ke vi estus klopdinta ne meti vin en tian situacion tial, ke ŝia vidado bonege montrus al vi, ke ne estas beleco, kiu povus al la ŝia esti komparata. Sekve, mi ne diras al vi, ke vi mensogas, sed, ke vi maltrafas la proponon, kaj kun la kondiĉoj, kiujn vi diris, mi akceptas la inviton al duelo, tuj, por ke ne pasu la tago, kiu estas al vi difinita; mi nur esceptigas el viaj kondiĉoj tiun, ke pasu al mi la famo de viaj faroj, ĉar mi nescias, kiuj nek kiaj ili estas: per la miaj, kiaj

ili estas mi kontentiĝas. Prenu do la distancon, kiun vi volos; mi faros same, kaj kiun Dio benos, Sankta Petro rebenu.“

Oni ekvidis de la urbo la kavaliron de la Blanka Luno, kaj oni sciigis la vicreĝon, ke li estas parolanta kun Don Kihoto de la Manĉo. La vicreĝo, kredante ke ĝi estas nova aventuro fabrikita de Don Antonio Moreno aŭ de alia Sinjoro de la urbo, eliris tuj al la marbordo kun Don Antonio kaj aliaj multaj Sinjoroj, kiuj akompanis ilin, ĵus kiam Don Kihoto turnis la kondukilojn de Rocinanto por preni la necesan spacon. Vidinte, do, ke ili iras renkontiĝi, la vicreĝo sin metis inter ilin, demandante pri la kaŭzo de tia improvizita batalo. La kavaliro de la Blanka Luno respondis, ke ĝi devenas de beleco, kaj per malmultaj rezonoj, li diris la samon, kion li estis dirinta al Don Kihoto, kaj la akcepton de la kondiĉoj faritaj de ambaŭ flankoj. Alproksimiĝis la vicreĝo al Don Antonio, kaj demandis mallaŭte, ĉu li scias, kiu estas la kavaliro de la Blanka Luno, ĉu tio ĉi estas ia moko, kiun oni intencas fari al Don Kihoto. Don Antonio respondis, ke li nescias kiu li estas nek ĉu la duelo estas ŝerca aŭ serioza. Tiu ĉi respondo hezitis la vicreĝon, ĉu li lasos antaŭeniri la batalo; sed ne povante kredi, ke la afero ne estas ŝerca, li malproksimiĝis dirante: „Sinjoroj kavaliroj! se ĉi tie ne estas alia rimedo ol konfesi aŭ morti, kaj Sinjoro Don Kihoto deziras kaj via moŝto, Sinjoro de la Blanka Luno deziregas, estu laŭ la volo de Dio kaj jen al vi!“ La Blanklunulo dankis per afablaj kaj diskretaj paroloj la vicreĝon pro la permeso, kiun li donis, kaj Don Kihoto faris la samon; tiu ĉi, sin rekomendis

tutkore al la ĉielo kaj al sia Dulcineo — kiel li kutimis ĉe la komenco de la bataloj, — re-prenis iom pli da spaco, ĉar li vidis, ke lia kontraŭulo faris la samon, kaj ne blovinte trumpeton nek alian militan instrumenton, por doni la signalon ataki, ili returnis ambaŭ samtempe la rimenojn al siaj ĉevaloj. Tial, ke tiu de la Blanklunulo estis pli rapida, ĝi alvenis al Don Kihoto ĉe la du trionoj de la kurado, kaj tie li renkontis lin kun tia granda forto, (ne tuŝante lin per la lanco, kiun eble intence li levis) ke li sendis teren Rocinanton kun Don Kihoto en tre danĝera falo. Li iris tuj sur lin, kaj metinte al li la lancon sur la vizieron, li diris: „Venkita vi estas, kavaliro, kaj eĉ mortinta se vi ne konfesas la kondiĉojn de nia duelo.“ Don Kihoto, muelita kaj perturbita, ne levante la vizieron, kaj kvazaŭ li parolus el tombo, per malforta kaj ŝanĝita voĉo diris: „Dulcineo del Toboso estas la plej bela virino en la mondo, kaj mi la plej malfeliĉa kavaliro sur la tero, kaj ne estas justa, ke mia malfortikeco faru malbonon al tiu verajo; premu, kavaliro, la lancon, kaj forprenu al mi la vivon, ĉar vi jam al mi forprenis la honoron.“ „Tion ĉi, mi ja certe ne faros, — diris la Blanklunulo, — vivu, vivu en sia tuteco la famo de la beleco de Sinjorino Dulcineo del Toboso; mi kontentiĝas nur per tio, ke la granda Don Kihoto reiru kaj restu en sia vilaĝo dum unu jaro, aŭ ĝis kiam mi ordonos, kiel ni interkonsentis antaŭ ol ni komencis tiun ĉi batalon.“ Ĉion ĉi aŭdis la vicreĝo kaj Don Antonio kun aliaj multaj, kiuj tie estis, kaj ili ankaŭ aŭdis, ke Don Kihoto respondas, ke kondiĉe ke oni ne petos ion, kio povos esti malutila al Dulcineo,

cion alian li plenumos, kiel akurata kaj vera kavaliro. Kiam tiu ĉi konfeso estis farita, turnis la kondukilojn la Blanklunulo, kaj farinte per la kapo riverencon al la vicreĝo, li eniris duongalope en la urbon. La vicreĝo ordonis al Don Antonio, ke li iru post li, kaj sciigu kiu li estas. Oni levis Don Kihoton, oni malkovris al li la vizagon, kaj trovis lin senkoloran kaj traŝvitantan. Rocinanto, pro vera malboniĝo, ne povis moviĝi. Sanĉo tute malgaja, ĉagrenita, ne sciis, kion diri nek kion fari. Ŝajnis al li, ke la tuta aventuro okazas en sonĝo, kaj ke tiu tuta faritajaro estas ensorcada afero. Li vidis sian majstron venkitan kaj devigitan ne preni armilon dum unu jaro. Li imagis al si la brilan gloron de liaj faroj malheligita, la esperojn de liaj novaj promesoj disigitaj, kiel disiĝas fumo per vento. Li timis, ke restos Rocinanto kripligita, aŭ disartikigita lia majstro: kaj ne estus malmulta feliĉo se li nur restus disartikigita! Fine, sur portilo, kiun venigis la vicreĝo, oni transportis lin al la urbo, kien ankaŭ revenis la vicreĝo dezirante scii, kiu estas la kavaliro de la Blanka Luno, kiu, en tiu malbona stato, lasis Don Kihoton.

Ĉapitro LXV.

Kie oni donas sciigojn pri la Blanklunulo, pri la libereco de Don Gregorio, kaj aliaj okazintaĵoj.

Sekvis Don Antonio Moreno la kavaliro de la Blanka Luno, sekvis ankaŭ kaj eĉ persekutis lin multaj knaboj, ĝis kiam oni lasis lin

en gastejo interne de la urbo. Eniris en ĝin Don Antonio dezirante koni lin; venis arm-servisto por akcepti kaj senarmiligi la kavali-ron; li enfermiĝis en teretaĝa ĉambro kaj kun li Don Antonio, kiu estis malpacienca kaj volis scii, kiu li estas. La Blanklunulo vidante, do, ke tiu Sinjoro ne lasas lin, diris al li: „Mi bone scias, Sinjoro, por kio vi venas: vi volas ekscii, kiu mi estas; kaj ĉar ne estas motivo por rifuzi tion al vi, mi ĝin diros, dum mia servisto sen-armiligas min, kaj mi ne kaŝos eĉ unu punkton pri la vero de la okazintaĵo. Sciu, Sinjoro, ke oni nomas min, la abituriento Sansono Carrasco. Mi estas el la sama vilaĝo kiel Don Kihoto de la Manĉo, kies frenezeco kaj simplanimeco kompatigas ĉiujn, kiuj lin konas; kaj inter tiuj-ĉi, estas mi. Kredante, ke lia savo dependas de lia ripozo kaj de tio, ke li restos en sia lando kaj hejmo, mi elpensis ion por tien lin revenigi. Antaŭ preskaŭ tri monatoj mi eliris sur la vojojn kiel migranta kavaliro, nomante min la kavaliro de la Speguloj, kun intenco batali kun li kaj venki lin, farante al li nenian mal-bonon, sed deklarante kiel batalajn kondiĉojn, ke la venkito restos al la volo de la venkinto. Tio, kion mi intencis peti de li — ĉar mi jam antaŭ-juĝis lin venkita — estas, ke li revenu al sia vilaĝo, kaj ke li ne eliru el ĝi dum unu tuta jaro, por ke intertempe li povu resaniĝi. Sed la sorto alimaniere decidis, ĉar li venkis min, kaj li faligis min de la ĉevalo, kaj tial mia penso ne efektiviĝis; li daŭris sian vojon kaj mi revenis venkita, hontigita kaj muelita de la falo, kiu eĉ estis danĝera. Sed malgraŭ tio, ne malaperis mia deziro reserĉi kaj venki lin, kiel hodiaŭ oni vidis. Kaj ĉar li estas tiel akurata

en la obeo al la reguloj de la migranta kavaliraro, sen ia dubo li obeos, plenumante la promeson, kiun li faris al mi. Tio ĉi estas, Sinjoro, kio okazas, kaj mi havas nenian alian aferon por diri al vi; mi vin petegas ne malkovru min, nek diru al Don Kihoto, kiu mi estas, por ke miaj bonaj pensoj povu havi efikon kaj por ke reakiru sian saĝon tiu homo, kiu estus tre prudenta se li estus liberigita de la kavaliŝoj malspritaĵoj.“ „Ho, Sinjoro! — diris Don Antonio, — Dio pardonu al vi la ofendon, kiun al la tuta mondo vi faras dezirante resaĝigi la plej amuzan frenezulon, kiu ekzistas. Ĉu vi ne vidas, Sinjoro, ke la profito, kiun okazigos la saĝeco de Don Kihoto ne povos esti pli granda ol la plezuro, kiun li faras per siaj deliroj? Sed mi imagas, ke la tuta spriteco de Sinjoro la abituriento ne sufiĉos por resaĝigi viron tiel multe frenezan; kaj se tio ne estus kontraŭ la kompato, mi dirus: ke neniam resaniĝu Don Kihoto, ĉar per lia sano, ni ne nur perdus liajn amuzajojn, sed ankaŭ tiujn de Sanĉo Panco lia armpaĝio, kiuj povus regajigi la melankolion mem. Malgraŭ ĉio ĉi, mi silentos kaj nenion mi diros al li, por vidi ĉu mi ne eraras suspektante, ke ne havos efikon la klopodo de Sinjoro Carrasco.“ Tiu ĉi respondis, ke jam estas en bona vojo tiu afero, de kiu li esperis bonan sukceson. Proponinte al Don Antonio fari, kion li bonvolos ordoni, li adiaŭis lin, kunligis siajn armilojn sur mulon kaj tuj, li eliris el la urbo tiun tagon mem, rajdante sur la sama ĉevalo kun kiu li eniris en batalon: Li revenis en sian patrolandon, kaj ne okazis al li afero, kiu devigas nin prirakonti en tiu vera historio. Don Antonio raportis al

la vicreĝo ĉion, kion Carrasco diris al li, kaj de tio ne ricevis la vicreĝo grandan plezuron, ĉar per la foriĝo de Don Kihoto, perdiĝis la tuta amuzo, kiun havis ĉiuj, per liaj frenezajoj.

Ses tagojn restis en la lito Don Kihoto, melankolia, malgaja, pensema kaj kun malbona humoro, irante kaj venante per la imagado tra la malfeliĉa okazo de lia malvenko. Sanĉo konsoladis lin, kaj inter aliaj rezonoj li diris: „Mia Sinjoro; levu, via Moŝto, la kapon kaj gajigu, se vi povas, kaj danku la ĉielon tial, ke kvankam li faligis vin teren, vi ne restis kun frakasita ripo. Kaj ĉar vi scias, ke kie oni donas oni prenas, kaj ke ne ĉiam estas porkoj kie estas palisoj, adiaŭu la kuraciston, ĉar vi ne bezonos, ke li kuracu vin en tiu ĉi malsano. Ni revenu ĉe nin, kaj ni lasu la serĉadon de aventuroj tra landoj kaj lokoj, kiujn ni ne konas. Se oni bone konsideras la aferon, mi estas tiu, kiu pli multe perdas, kvankam estas via Moŝto, kiu difektiĝis pli multe. Mi, kiu forlasis kun la reglando la deziron esti reganto, ne forlasis tamen la deziron esti grafo. Sed tio neniam efektiviĝos, se via Moŝto ne fariĝas reĝo kaj lasas la ekzercadon de la kavaliroco, kaj tial, miaj esperoj fariĝas fumo.“ „Silentu Sanĉo, ĉar vi ja vidas, ke mia enslosiĝo kaj apartiĝo ne daŭros pli ol unu jaro, kaj ke tuj mi revenos al miaj honestaj ekzercoj, kaj ne mankos al mi regno, kiun mi gajnos, nek graflando, kiun mi donos al vi.“ „Dio aŭdu tion ĉi, — diris Sanĉo, — kaj la peko estu surda, ĉar ĉiam mi aŭdis diri, ke pli valoras bona espero ol malnobla posedajo.“

Tie-ĉi ili estis, kiam Don Antonio eniris

dirante kun montró de grandega kontenteco: „Ĝojegon, Sinjoro Don Kihoto! ĉar Don Gregorio kaj la renegato, kiu serĉis lin, estas ĉe la marbordo; — ĉu mi diris ĉe la marbordo? — en la domo de la vicreĝo li jam estas, kaj tuj li estos tie ĉi.“ Gajiĝis iom Don Kihoto kaj li diris: „Vere, mi preskaŭ volas diri, ke multe plaĉus al mi, ke la afero okazus male, ĉar ĝi devigus min transpasi en Berberion, kie per la forto de mia brako mi liberigus ne nur Don Gregorion, sed ĉiujn kaptitajn kristanojn, kiuj estas en Berberio. Sed, kion mi, mizerulo, diras? Ĉu mi ne estas la venkito? Ĉu ne mi, — la faligito? Ĉu ne mi, — kiu ne povas preni armilojn dum unu jaro? Do, kion mi promesas? pro kio mi laŭdas min, se pli konvenas al mi uzi la ŝpinilon ol la spadon?“

„Lasu tion ĉi, Sinjoro, — diris Sanĉo, — vivu la kokino eĉ kun sia pipso, ĉar hodiaŭ por vi kaj morgaŭ por mi. Oni ne devas tro atenti tiujn aferojn de renkontiĝoj kaj bastonbatoj, ĉar tiu, kiu hodiaŭ falas, povas sin levi morgaŭ, se li ne preferas resti en la lito: mi volas diri, ke vi senkuraĝiĝas ne akirante novajn fortojn por novaj bataloj; nun leviĝu, por akcepti Don Gregorion, ĉar ŝajnas al mi, ke la personaro estas bruega kaj certe li estas en la hejmo.“

Kaj estis vero, ĉar Don Gregorio kaj la renegato sciigis la vicreĝon pri sia reveno, kaj Don Gregorio deziris vidi Anan Felix'on, li venis kun la renegato al la domo de Don Antonio. Kvankam oni eltiris Don Gregorion el Alĝero kun virina kostumo, li en la ŝipo ŝanĝis ĝin per tiu de kaptito, kiu foriris kun li; sed, kiu ajn estus lia vestaĵo, li ĉiam montriĝus kiel persono aminda, servinda kaj estiminda, ĉar li

estis bela super ĉio, kaj lia aĝo ŝajnis esti dek sep aŭ dekok jaroj. Ricote kaj lia filino eliris por akcepti lin; la patro kun larmoj, la filino kun honesteco. Ili ne ĉirkaŭprenis sin unu la alian, ĉar kie estas tro da amo, ne kutimas esti tro da malembaraso. Ambaŭ belecoj kune, — tiu de Don Gregorio kaj tiu de Ana Felix, — tute mirigis ĉiujn ĉeestantojn. La silento parolis tie por ambaŭ geamantoj; kaj la okuloj estis la langoj, kiuj malkovris iliajn gajajn kaj honestajn pensojn. La renegato rakontis la artifikon kaj rimedon, kiujn li uzis por eltiri Don Gregorion. Rakontis tiu ĉi la danĝerojn kaj embarasojn, kiujn li havis ĉe la virinoj kun kiuj li restis, ne per longaj rezonadoj, sed per mallongaj vortoj. Per tio li montris, ke lia inteligenteco estas pli granda ol lia aĝo. Fine, Ricote pagis kaj kontentigis liberalc la renegaton kaj la homojn, kiuj penis ĉe la remiloj. Ree aliĝis kaj submetiĝis la renegato al la Eklezio, kaj li, putrinta membro, fariĝis denove pura kaj sana per la pento kaj per la bedaŭro.

Post du tagoj, la vicreĝo priparolis kun Don Antonio, kiun rimedon ili povus uzi, por ke Ana Felix kaj ŝia patro restu en Hispanujo. Ŝajnis al ili, ke ne estas ia malhelpo por ke tie restu tiel kristana filino kaj patro tiel bonintenca. Don Antonio proponis iri mem en la ĉefurbon, kien li nepre devis iri por aliaj negocoj, kaj tie aranĝi la aferon; li komprenigis ke tie, per favoroj kaj donacoj, oni solvas multajn malfacilaĵojn.

„Ne; — diris Ricote, kiu ĉeestis al tiu priparolado, — ni nenion devas esperi de favoroj nek donacoj, ĉar al la granda Don Bernardino de Velazco, Grafo de Salazar, lia Majesta Moŝto

donis la zorgon de nia forpelo, kaj valoras nek petegoj, nek promesoj, nek donacoj, nek kompatindaĵoj. Estas vero, ke li miksas la kompatemon kun la justeco, ĉar li vidas, ke la tuta korpo de nia nacio estas infektita kaj putranta, tamen li pli volonte uzas la ardantan kaŭterizon ol la moligan ŝmirajon. Sekve, kun prudenteco, sagaceco kaj diligenteco, kaj kun la timoj, kiujn li inspiras, li portis sur siaj fortikaj ŝultroj ĝis deca plenumo la pezon de tiel granda maŝino. Kaj niaj artifikoj, ruzoj, petoj kaj trompoj ne povis blindigi liajn okulojn de Arguso, kiuj ĉiam estas viglaj por ke neniu al li restu kaŝita, kvazaŭ nevidebla radiko, kiu kun la tempo povos burĝoni kaj doni fruktojn venenajn en Hispanujo, lando jam purigita, jam liberigita de la timoj, kiujn pro ili havis nia popolo. Heroa decido, tiu de la granda Filipino III^a kaj neaŭdita prudenteco, konfidi ĝin al tiu Don Bernardino de Velazco!“

„Mi tie faros ĉiujn eblajn klopodojn kaj volu la ĉielo tion, kio pli plaĉos al ĝi; — diris Don Antonio, — Don Gregorio venos kun mi por konsoli la suferon, kiun liaj gepatroj ricevis per lia forestado. Ana Felix restos kun mia edzino en mia hejmo aŭ en monaĥinejo; kaj mi scias, ke al Sinjoro la vicreĝo plaĉos, ke restu en lia domo la bona Ricote, ĝis li vidos, kiel mi sukcesos.“

La vicreĝo konsentis pri ĉio proponita; sed Don Gregorio, sciante, kio okazas, diris, ke neniel li povas nek volas lasi Doña Ana Felix. Sed dezirante revidi siajn gepatrojn kaj tuj reveni por ŝi, li fine akceptis la interkonsentitan decidon: Ana Felix restis kun la edzino de Don Antonio, kaj Ricote en la hejmo de la vicreĝo.

Alvenis la tago de la foriro de Don Antonio, kaj poste, tiu de la foriro de Sanço kaj Don Kihoto, al kiu la falo ne permesis, pli frue sin meti sur la vojon. Okazis larmoj, okazis ekĝemoj, kaj svenoj, kiam Don Gregorio adiaŭis Anan Felix'on. Ricote proponis al Don Gregorio mil ormonerojn, se li ilin volas; sed li prenis neniun, krom kvin, kiujn pruntedonis Don Antonio al li, kaj kies redonon li promesis. Kun tio, ili ambaŭ foriris; poste foriris Don Kihoto kaj Sanço, kiel oni diris: Don Kihoto malarmita kaj en vojkostumo, Sanço piediranta, ĉar la azeno estis ŝargita per la armiloj.

Esperanta Biblioteko Internacia.

Ĝis nun aperis:

- No. 1. **Legolibreto**, de J. Borel.
 - No. 2. **Fabeloj de Andersen**, tradukitaj el dana lingvo, de Fr. Skeel-Giörling.
 - No. 3. **Bona Sinjorino**, novelo de E. Orzeszko, tradukita el pola lingvo de Kabe.
 - No. 4. **Rusaj Rakontoj**, de Mamin Sibirjak, tradukitaj el rusa lingvo de N. Kabanov.
 - No. 5. **Don Kihoto en Barcelono**, tradukita el hispana lingvo de Fr. Pujulà y Vallès.
-

Jurnaloj tute en Esperanto.

- Oficiala Gazeto Esperantista**: Organo de la Lingva Komitato kaj de la Konstanta Komitato de la Kongresoj. 51, Rue de Clichy, Paris. 2,— Sm.
- Dia Regno**: *Mühlheim (Rhein)*. P. Hübner, Friedrich-Wilhelm-Strasse 66. 0,90 Sm.
- Esperanto**: *Genève (Svis.)*, oficiala organo de Universala Esperanto-Asocio, duonmonata. H. Hodler, 8, Rue Bovy-Lysberg. 1,90 Sm.
- Esperanta Ligilo**: *Paris (Franc.)*, monata organo en reliefpunktoj por blinduloj. Ĉefredaktoro: Th. Cart, 12, Rue Soufflot. 1,20 Sm.
- Espero Katolika**: *Paris (Franc.)*, monata. Administracio kaj redakcio Claudius Colas, 10, Rue Béranger. 2,— Sm.
- Hispana Revuo**: *Madrid (Hispan.)*, ilustrata monata revuo. Josefo Menendez, Strato Echegary 17. I. 1,30 Sm.

Internacia Pedagogia Revuo: *Bystrice - Hostyn,*
Moravio, Aŭstrio. Theodor Ĉejka. Membroj 1,— Sm.
Nemembroj 1,50 Sm.

Internacia Sciencia Revuo: *Genève (Svis.),* monata.
R. de Saussure, 8, Rue Bovy-Lysberg. 2,75 Sm.

Internacia Socia Revuo: *Paris (Franc.),* monata.
R. Louis (Maison Commune), 49, Rue de Bretagne.
1,40 Sm.

Jen: *Barcelona (Hispania),* multilustrita bonhumora monata
gazeto. Ramon Farré, str. Portaferriça 17. 1,20 Sm.

Juna Esperantisto: *Paris (Franc.),* monata gazeto
por junuloj, instruistoj kaj Esperantolernantoj. Presa
Esperant. Societo, 33, Rue Lacépède. 1,— Sm.

La Bela Mondo: *Dresden (Germ.),* ilustrata monata
gazeto. F. Emil Boden, Bismarckplatz 12. 3,— Sm.

La Revuo: *Paris (Franc.),* internacia monata literatura
gazeto, 48 paĝoj. Administracio: Librejo Hachette
& Co., 79, Boulevard St. Germain. 2,75 Sm. Por
Germanujo kaj Aŭstrujo ĉe Esperanto Verlag
Möller & Borel, Berlin S.W. 68, Lindenstr. 18-19.

La Spritulo: *Leipzig (Germ.),* monata gazeto
ĉerco, humoro kaj satiro. Richard Bresch, Körner-
strasse 31. 1,20 Sm.

Lingvo Internacia: *Paris (Franc.),* monata organo.
Kun aldono literatura. Presa Esperantista Societo,
33, Rue Lacépède. 3,— Sm.

Voĉo de Kuracistoj: *Lwów (Galicio),* D-ro Stefan
Mikolajski, strato Sniadeckich 6. 1,— Sm.